

928
バ
18

曝書亭集





曝書亭集卷第七十六

秀水 朱彝尊 錫鬯

墓誌銘三

孝潔姜先生墓誌銘

慈谿姜君宸英詩文傾折海內士

天子知其姓字然屢赴鄉試不見錄也既而用薦入史館支  
正七品俸纂修明史又分撰一統志月給餐錢衣儒生衣雜  
坐公卿之次會 覃恩勅授文林郎贈考妣如其階歲在己  
巳冬刑部尚書總裁官崐山徐公乾學告歸 詔許以書局  
自隨公上言引君自助於是君將還葬其考孝潔先生于夏  
家畧華盆山之陽妣孫孺人祔焉持狀請彝尊誌其墓誌曰  
先生諱晉珪字桐侯別字卓菴先世自蜀遷于越居嶧縣再





徙餘姚復徙慈谿曾祖國華丁士美榜進士累官陝西布政使司右參議階朝列大夫贈太僕寺少卿祖應麟中先文恪公榜進士以戶科給事中抗疏爭鄭貴妃冊封謫典史後歷太僕寺少卿階中憲大夫贈太常寺卿父司簡官戶部司務母向孺人妻孫孺人先生少補儒學生員貢于鄉年三十七不復應舉研精理學工詩兼通六書辨其源流又嫻經世之略性至孝友愛諸弟與人交愷易然取與必以義雖勢力不能奪也太常公以廉節自勵遺產僅百畝司務君舅弟分受之先生舅弟又三分之一力不能給饘粥兵後家計益窘無以爲親養乃游學北至燕趙東浮洛西游秦蜀東脩所入歸以養父母孫孺人曲成其孝一味不以自甘必先進舅姑曉問寢安否庭闈燕衍靡以異先生在家也先生既遠親舍歲時

恒望鄉遙拜發爲歌詩多幽憂悱惻之言音甚酸楚今所傳泛鳧吟藁是已迨向孺人歿先生適在旅次訃至嘔血數升遂中失血症服除將之瑞州道出常山疾發卒于草坪旅舍時康熙十一年五月日也年六十三宸英扶其匱歸先生之執友張能信林三錫等交泣下僉曰君之事親可謂孝矣君之高蹈可謂潔矣遂私謚曰孝潔先生先生歿後七年孫孺人亦卒孺人國子監生之蒞之女朝列大夫知德州事森之孫贈朝列大夫某之曾孫子男二人宸英宸芝女一人嫁儒學生員凌瑄孫男三人女六人嗚呼自先王制產之法廢士之貧者無以養其親於是陟岵鳴呼北山蓼莪四月之詩作焉雖不能養與祭君子必以孝子目之蓋惜其遇而憫其志之不得已也先生之孝終食不遺其親顧以貧故適四方資僚



友縞紵之貽以供菽水是亦潔白之養矣子職未盡者孫孺人以婦道成之宸英又克繼其志然則先生可無憾于泉下而因行受名庶幾克副其實者乎於其葬也宜銘銘曰  
學焉而弗措也才焉而不遇也勞人之賦也孺子之慕也有賢妻為之助也有令子為之嗣存故反也子未服官而贈及其親天子之異數也考卜于原有龔者檀有苑者粉葬先生于是嬪也祔此幽宅既安斯蕃衍而孫子

贈日講官起居注翰林院檢討徵仕郎貞靖潘先生墓誌銘

康熙十有七年春

天子有詔徵文學之士吳江潘君未被薦明年 召試體仁閣下賦最工以布衣除翰林院檢討越二年充日講官知起

居注其冬雲南平

天子推恩及臣下於是君之考處士貞靖先生得贈日講官起居注翰林院檢討徵仕郎君之妣章氏贈孺人母吳氏封太孺人又明年會試天下士君與分校得人最盛又明年遭勅謫官吳太孺人歸卒于里君聞訃奔還旋卜地鷺脰湖之南以康熙二十五年閏月辛酉合葬焉先生諱凱字仲和一字豈凡別字貽令世居吳江平望市曾祖雲隱居不任祖志伊中嘉靖四十四年進士仕至廣西布政使司右參政父錫祚湖廣布政司理問母吳孺人先生事親孝事兄最恭其為學殫心經世之略其文見稱于太倉張采與同縣吳允夏包捷吳翽文章行誼相切劇補縣學生員連試第一當是時在朝之君子多自附東林而海內名士以聲氣應和曰復社先



生與焉周之蔓者與諸君子構難撫君過作復社或問而無錫馬公世奇太倉張公溥並力爭之德清章君日烱愛君文以女歸先生既而知吳江縣事先生深自退匿未嘗干以私惟於清賦額疏水道事關民利害則建白行之先生爲詩典雅尤工赤牘雖忽遽不作草書遭亂破家遂屏棄時文纂平望志及本草類方合文集凡數十卷子三人檀章楨吳存者未也女三人一嫁周撫辰一許嫁顏祁未行卒一嫁陳鉉孫四人吳太孺人在室以孝聞嘗割股療母病爲先生繼妻撫前妻子女如己出既寡家酷貧手紡績延名師訓未以通經博古及未爲侍從臣太孺人未嘗美衣食君既謫官太孺人無幾微不自得之色曰窮達有命安之可矣貞靖先生卒時年四十有九章孺人卒年三十有二吳太孺人年六十有六

彝尊與君定交也久同年被薦同以布衣授官同起居注其謫也又同時熟聞君家世於君請銘不敢辭銘曰

相彼貞木其實有蕢或碎于地或登于槃而終以勿餐嗚呼先生既昌而文以詒後昆阨窮奚怨

贈翰林院檢討徵仕郎徐先生墓誌銘

翰林院檢討吳江徐君欽請假還里葬其考妣于光字圩逾年矣旣而謫官去屬同年友朱彝尊爲文表諸墓銘曰

君之先人韞奇諱其曰季華冠而字上世本居魏塘界遷于吳江自碩始西濛之港面積水以耕以耨治農事先生爲儒試不利仰屋著書抽腹笥遯世无悶窮勿悔兄當餽運渡江介是時淮北人爲戡先生愛兄心孔悻以金三百輸諸吏兄得不行方用慰兄子曰鑛結壯士以保鄉黨計不遂亡命西



吳全匪易先生誥吏慷慨對產雖破碎禍則解嘗懷白金步入肆人壓看場集如蝟烏前楚囊遺在地誠以語人人作偽探懷乃悟己所墜發之鉢兩皆默識人慙欲以半相畀先生怡然笑勿視衡門之下可樂志釀秫種花性所嗜孺人王韓先生配有子克家孫克類伯也不仕仲委質揚名顯親光有位贈徵仕郎通貴揭石于原表風義猗嗟千秋永無毀

小譚大夫墓誌銘

小譚大夫吉璉諱舟石字嘉興人以祖父嘗爲大夫旣仕以小譚大夫自別大夫之祖諱昌言山東布政司參政贈太僕寺卿父則五經進士諱貞良也母宜人朱氏是爲彞尊之姑大夫年十四通五經旋補學官弟子弱歲以文貢入國子監南京不守大夫從父母攜弟妹妻子浮海至會稽復自台州

抵福州轉徙漳州道遇寇父被傷大夫力以身蔽寇拔刃睨之不動鎗擊其背不去寇曰孝子也舍之父病歿家人三十口留亂軍中斗米三千錢卒全活扶父柩還尋以貧游學四方客汝寧聞母病疾歸則已蓋棺大夫號踊以頭觸棺棺釘破其顱血濡縷旣絕而蘇母喪除入京師以國子監生試第一授弘文院撰文中書舍人晨出敝裘羸馬入院還坐一室勘經史有以詩文請者立使者于戶外削橐與之仕九年乃遷同知延安府事治榆林至則修學建尊經閣以十三經注疏貯閣中縱士子覽觀又采儀禮參以本朝制度行鄉飲酒禮又援據史傳旁及載紀小說家兼從宿將故老詢流寇始末成延綏鎮志二十四卷康熙十二年吳三桂叛明年大夫運關中饟十萬入四川至寧羌州兵變殺經略莫洛於是巡



無杭愛移駐漢中追還所運饟十二月漢中食盡

王師退保西安棧道絕乃從黑水峪間道七晝夜達盩厔既抵榆林定邊副將朱龍反逼波羅堡去榆林百里而近大夫集士民于漢前將軍關侯廟為文誓侯前願以死守士民咸感奮乃編什伍明号令製幡幟嚴斥堠夜自宿城上眾藉以安未幾西川人周繼明聚眾千人與神木叛將孫崇雅合陷延安綏德勢張甚榆林兵迎戰不利運道塞環城三十里皆賊壘城中刮木皮采蒿以食大夫謀于上官率私錢命勇士取徑渡黃河買粟于山西之保德河曲突圍以入當是時延安一府縣十九城堡三十六相繼淪陷惟榆林城獨完圍既解餘寇據響水清平鎮羅諸堡大夫騎匹馬喻以禍福及神木崇雅繼明皆降事平論功加一級十七年 詔舉博學宏

詞之士有以大夫薦者徵詒

闕既至遷知登州府事大夫

之為中書舍人也有小夫供事內院趨走若奴隸既而其人從軍自效以招降王輔臣功超擢布政為登萊監司大夫反出其下鬱鬱不自得其人益自倨屢以計傾大夫卒為所構吏議降二級調用會大夫子有鉉已納婦矣而天大夫悲不自勝疾發遂卒譚氏之居在香花橋東其坊曰碧漪堂之左有鴨脚樹三本彝尊童子時與大夫兄弟讀書其下一日語彝尊曰詩書莫不有序子知周禮亦有序乎答曰不知也曰尚書周官一篇即周禮之序矣其讀書善悟類是大夫好撰述游昌平著肅松錄二卷又嘗著爾雅綱目一百二十卷所為詩古文辭有嘉樹堂集二十卷鴛鴦湖櫂歌一卷卒之歲年五十有七娶李氏女子二人一嫁陸大勳一嫁沈以機皆



國子監生其葬也在某原銘曰

生而逸後乃勞陸走叢菁川波潮文不遇學則優終為右史  
雄詞曹長榆林塞土磽疏泉種稻成樂郊寇宄起如牛毛登  
陴以守氣不撓縮左符亦足豪屈首置下尻居高嗟善人壽  
宜多生子短折命安逃相斧屋度隰臯伐石書銘鑱諸幽

徵士徐君墓誌銘

唐制博學宏詞有科廢不行久矣康熙十七年

天子法古爰命內外大小臣工各舉所知徵入都於是浙  
江巡撫以海寧徐君林鴻應詔明年春召試太和殿庭  
布席體仁閣下中使傳旨向來殿試進士定例立而對  
策今以爾等績學博聞特賜坐賜食僉謝恩畢既納卷次  
日

天子行大蒐禮次郊圻東卷授三大學士暨掌院學士定

其高下君時名藉甚又與同里吳君農祥王君嗣槐吳君任  
臣蕭山毛君奇齡宜興陳君維崧成爲大學士馮公延致邸  
第都人所稱佳山堂六子也僉謂讀卷者馮公卷不彌封君  
必見錄及駕旋命下入史館者五十人授中書者七人

君乃見遺君子於是歎馮公之無私尤服君之不肯干進也  
君學通今古凡山川險隘錢穀鹽筴之出納律令格式之寬  
嚴皆總其要又工于作奏以是督撫大吏學使齟使交引以  
自助然取與不苟館穀所入不能治田園所居破屋數間清  
池半畝時與故交把酒劇談以爲樂居幕府削赤牘晝夜多  
至百函善寫人胸臆賦才瀏亮古詩音逼齊梁近體和平婉  
麗獨不愛曲子有強以填詞者倚聲歌之陰陽悉中律嘗客



貴州勸巡撫因民之俗立瞿公式耜張公同敞祠為作神弦  
迎送之曲土人歡忭華冠繡衣擊銅鼓鳴鐵鑼歌焉曲終苗  
童犍女皆感慨泣下其于史事尤練達本末不曲徇黨人之  
論分撰通志發凡立例綱目秩然論者以君不與纂修明史  
之列交惜之君善鑒賞別書畫禮器偽真兼善飲嘗過顧御  
史豹文別業御史知君大戶出雷尊貯酒容一斗賓客多避  
席君連舉者三御史曰此何年製也君笑曰北齊文宣帝天  
保六年避暑晉陽宮所作也驗其下款識果然知永嘉縣事  
漢陽王君世顯去官留杭州處士南昌王君猷定寓昭慶僧  
舍先後客死君視含斂送其柩至江浦乃還太倉王徵士昊  
慈谿周處士容卒于京君為治器收其文集以竣奔者蓋君  
急于交誼若是不獨以孝友稱門內而已君之先本莆田林

氏後分支台州之黃巖再徙海寧黃徐氏因襲其姓曰輅嘉  
靖庚子舉人仕為福建永安知縣君之曾祖考也曰元倬考  
也妣某氏君字大文一字寶名少補學官弟子生某年月日  
卒某年月日享年六十有九配茅氏明按察副使坤之孫某  
之子繼娶姜氏封監察御史某之子繼娶張氏某官某之孫  
處士某之子君有子男四人司祿司錫俱錢塘縣學生司祿  
繼從祖後司紀司直殤女六人孫男二人女二人其葬也于  
某原某年月甲子葬之日也銘曰

古於制科期收實學

天子曰咨維元老是擢嗚呼斯人才與命妨懷彼珠玉被褐  
而亡升者在朝棄者在野不有銘詩孰知君者

翰林院侍講尤先生墓誌銘



先生姓尤氏諱侗字同人更字展成別字悔菴又曰良齋晚  
自号西堂老人西堂者先生讀書之所也先世家無錫遠祖  
表以政事文學著南渡初詩家所稱尤蕭范陸是已子孫世  
登膺仕載萬柳溪邊舊話其後轉徙長洲之斜塘曾祖某有  
隱德祖某舉鄉飲賓考淪國子監生 敕贈徵仕郎翰林院  
檢討亦兩舉鄉飲賓妣孺人鄭先生少日博聞強記有才名  
補學官弟子歷試于鄉不利貢于 廷謁選除永平府推官  
不畏強禦坐撻旗丁降調康熙十七年春

天子仿古制科取士或薦先生于 朝 召試體仁閣下

上親擢五十人悉除翰林纂修明史同日入院先生最長以  
齒序四十九人皆坐其下留史局三年分撰志傳多至三百  
篇 覃恩授徵仕郎子珍以進士出身改庶吉士先生乃告

歸家居以詩文縑素請者盈庭戶先生揮灑不倦有求必滿  
其意同時汪編修琬居堯峰以古文自矜少可多怪見俗子  
議文章者恒面斥之以是人多畏縮咸樂先生之和易也歲  
已卯

天子南巡先生入見 御書鶴栖堂扁額以 賜時先生年

八十有二矣猶康彊善飯暇相地于官山之陰築生壙自爲  
之誌結丙舍曰艸艸山房俾予分書予嘗以天台萬年藤杖  
奉先生并作歌以贈先生喜劇然猶未寤于步不藉扶持也  
歲癸未

天子復南巡進先生官侍講甲申六月日以疾卒距生明萬  
曆四十六年閏月日享年八十有七配曹孺人有賢行官右  
春坊右贊善兼翰林院檢討者長子珍也次瑞縣附學生女



三人一嫁縣學生湯萬燁一嫁陝西提學按察僉事候補布政司參議陸德元一嫁縣學生金秉寬孫男一人世求以歲貢生考授知縣以能詩聞女五人俱配士族曾孫一人先生名雖未登甲乙榜早爲文社倫魁弟子著錄者多大學士崐山徐公元文其一也所作詩文流傳 禁蘊

世祖惜其才命相妨終受

聖主之知官之翰苑屢承

殊渥今年春尋尊諱杭州偕前

輩德清徐公倬謁見

皇太子于行殿 令旨賜坐謂曰老成易謝茲來又失一尤展成矣字而不名洵異數也已先生著述甚富所撰西堂雜俎觀者胥悅奉爲兔園冊晚輯良齋雜記學者服其雅馴全集五十四卷餘集七十卷鶴栖堂橐十卷俱鏤板行于世銘

曰

士也懷才或不售遭逢

聖世終旁求圭璋特達自有期鶴書 名君六十餘俾入史局掌詞曹君之才大筆不休有若札札機絲抽趨庭有子登亨衢遺榮辭老返衡茅難進易退世所高君子故里志逍遙水哉之軒蘭葉舟琴瑟几杖官山幽達天知命故不憂鶴栖堂深 御墨留人生百歲語本虛八十有七齒已優著史況足名千秋君今含笑歸山丘吾銘維實言不浮

承德郎日講官起居注右春坊右中允兼翰林院編修嚴君墓誌銘

康熙十有七年春

天子法古制科取士

詔在廷諸臣暨外督撫大吏各舉博



學之彥母論已仕未仕徵詒 闕月給太倉祿米明年三月朔 名試太和殿廷發題賦序詩各一首學士院散官紙光祿布席 賜讌體仁閣下於時無錫嚴君成省耕一詩而退賦序置不作也

天子擢五十人纂修明史部議分資格進士出身者以館職用餘給待詔銜俟史成日授官 詔下五十人齊入翰苑布衣與選者四人除檢討富平李君因篤吳江潘君耒其二子及君也君文未盈卷特爲

天子所簡尤異數云未幾李君疏請歸田養母得 旨去三布衣者騎驢入史局卯入申出監修總裁交引相助越二年上命添設日講官知起居注八員則三布衣悉與焉是秋子奉 命典江南鄉試君亦主考山西比還歲更始正月幾望

天子以逆藩悉定置酒 乾清宮飲讌近臣 賜坐殿上樂作羣臣以次奉觴上壽依漢元封柏梁臺故事

上親賦昇平嘉讌詩首倡麗日和風被萬方之句君與潘君同九十人繼和 御製序文勒諸石二月潘君分校禮闈卷

三布衣先後均有得士之目而館閣應奉文字院長不輕假人恒屬三布衣起草二十二年春予又入直 南書房 賜

居黃瓦門左用是以資格自高者合外內交構逾年予遂挂名學士牛鈕彈事而潘君旋坐浮躁降調矣君遇人樂易好和不爭以是忌者差少尋遷右春坊右中允兼翰林編修

教授承德郎時二十三年秋七月也冬典順天武闈鄉試事竣君乃請假

天子許焉當君未仕愛縣西洋溪丘壑竹樹之勝思買墓田



丙舍終老溪有橋曰瀉瀉因自号瀉瀉漁人時山陰吳公廷祚方知縣事許助草堂之資會應 召不果既出都遂浮舟度嶺訪吳公于肇慶采硯而還自是杜門不出築堂曰雨青草堂亭曰佚亭布以窠石小梅方竹宴坐一室以為常君為文無定格不屑蹈襲前人適如其意而止詩篇沖融恬易鮮矯激之言慢詞小令雅而不豔所著秋水集雜文七卷詩八卷詞二卷嘗屬予序之少工書法入晉唐人之室兼善繪事山水人物花木蟲魚靡不肖肖尤精畫鳳翔舞竦峙五光射目觀者歎息以為古畫手所無晚歲曾一修縣志敘族譜有以詩文圖畫請者槩不應暇輒埽地焚香而已君年六十有一返里居以康熙四十一年正月卒享年八十先世自餘姚遷無錫之嚴埭曾祖朝贈通議大夫南京通政司通政使祖一

鵬萬曆丁丑進士累官刑部左侍郎贈尚書考紹宗縣學生以君貴贈如君官君諱繩孫字孫友娶王氏中憲大夫知福州府事之女封安人子三沆曾殤泓曾溶曾孫六人曾孫五人其卜兆也在縣西蕭家灣銘曰君之通籍也

天語諄諄謂史局不可無此人君之請假也行將發軔 敕錄所撰詞以進蓋受

主知者深矣瀉瀉之橋洋溪之潄秋水時至比于君心陸羽王紱庶嗣其音



曝書亭集卷第七十七

秀水 朱彝尊 錫鬯

墓誌銘四

朝議大夫戶科給事中降補國子監學正趙君墓誌銘

君諱吉士字天羽一字恒夫姓趙氏世居徽州之休寧仕為光祿寺丞諱廷賢者君曾祖考也贈昭武將軍諱完璧者祖考也封文林郎進階奉直大夫贈朝議大夫諱時腴者考也妣汪氏累封恭人贈淑人君入籍杭州補府學生順治八年舉浙江鄉貢進士康熙七年謁選知太原交城縣事縣居萬山中巖磴參錯孔河出塔莎谷東南流會于汾故水曰交水山曰交山縣曰交城地近屈產畜馬絕有力又饒灌木歲取



曝書亭集卷第七十七

墓誌銘四

秀水 朱彝尊 錫鬯

朝議大夫戶科給事中降補國子監學正趙君墓誌銘

君諱吉士字天羽一字恒夫姓趙氏世居徽州之休寧仕爲光祿寺丞諱廷賢者君曾祖考也贈昭武將軍諱完璧者祖考也封文林郎進階奉直大夫贈朝議大夫諱時腴者考也妣汪氏累封恭人贈淑人君入籍杭州補府學生順治八年舉浙江鄉貢進士康熙七年謁選知太原交城縣事縣居萬山中巖磴參錯孔河出塔莎谷東南流會于汾故水曰交水山曰交山縣曰交城地近屈產畜馬絕有力又饒灌木歲取



其材以爲利君至日民間牧馬有禁上官廢南堡村木廠許沿河市賣由是利爲文水商民所奪文人重困往往去爲盜依山負固散則民聚則寇勢方張旁掠清源汾陽邢臺三縣君思翦除之首閱武于郭南令下士卒進退有序捐万錢犒焉還語賓從曰民可用也會年饑君錄餓者七十人完解舍垣牆使家人與處詢羣盜出沒所在多得其實爰申明乘墉保甲團練之法君乃言曰凶歲良民易迫爲盜吾當撫之遂詣河北都行荒政諭山農毋爲盜所脅日暮留宿陶穴詰朝相度蹊徑通塞村砦近遠知最險者三坐崖東西兩葫蘆川繞其下塞葫蘆口則官軍不得進保三坐崖則官軍不克登君默識之而還十年十月朔總督檄縣進勦君行令山麓葺靜安堡期以月幾望官兵進屯先七日置酒城隅却月湖張

樂于舫許老穉夾岸縱觀越宿復要昆山顧炎武華亭陸慶鏊上海蔡湘翦燭賦詩密誠司夜者促更籌于子刻打五鼓君起送客出郭則守備姚順等已先受約統步騎兵四百集南關外矣疾行四十里饗士卒于水泉灘別爲三隊並進入兩葫蘆川據三坐崖賊鳥獸散散復合且戰且奔官軍分搜巢窟先後獲魁渠二十二人餘或降或自剄君別淑慝召山農終始不作賊者三十七家賚以羊酒其素不當夫徭者千四百三十家編其籍入都畜入山旬有六日交山之寇悉平君治交五載餘修圖經新橫舍立倉廩定軍營折疑獄罰贖鍰使種柳鑿山通龍門渠漑田十方四千頃又力請上官復南堡村木廠秣善馬于驛士飽馬肥用降賊攻賊故能成功巡撫上其狀徵入爲戶部山西司主事居母憂還籍服除補



其材以爲利君至日民間牧馬有禁上官廢南堡村木廠許沿河市賣由是利爲文水商民所奪文人重困往往去爲盜依山負固散則民聚則寇勢方張旁掠清源汾陽邢臺三縣君思翦除之首閱武于郭南令下士卒進退有序捐萬錢犒焉還語賓從曰民可用也會年饑君錄餓者七十人完解舍垣牆使家人與處詢羣盜出沒所在多得其實爰申明乘墉保甲團練之法君乃言曰凶歲良民易迫爲盜吾當撫之遂詣河北都行荒政諭山農毋爲盜所脅日暮留宿陶穴詰朝相度蹊徑通塞村砦近遠知最險者三坐崖東西兩葫蘆川繞其下塞葫蘆口則官軍不得進保三坐崖則官軍不克登君默識之而還十年十月朔總督檄縣進勦君行令山麓葺靜安堡期以月幾望官兵進屯先七日置酒城隅却月湖張

樂于舫許老穉夾岸縱觀越宿復要昆山顧炎武華亭陸慶臻上海蔡湘翦燭賦詩密誠司夜者促更籌于子刻打五鼓君起送客出郭則守備姚順等已先受約統步騎兵四百集南關外矣疾行四十里饗士卒于水泉灘別爲三隊並進入兩葫蘆川據三坐崖賊鳥獸散復合且戰且奔官軍分搜巢窟先後獲魁渠二十二人餘或降或自剄君別淑慝召山農終始不作賊者三十七家賚以羊酒其素不當夫徭者千四百三十家編其籍入都畜入山旬有六日交山之寇悉平君治交五載餘修圖經新橫舍立倉廩定軍營折疑獄罰贖醵使種柳鑿山通龍門渠溉田十方四千頃又力請上官復南堡村木廠秣善馬于驛士飽馬肥用降賊攻賊故能成功巡撫上其狀徵入爲戶部山西司主事居母憂還籍服除補



戶部河南司主事載丁父憂起復補戶部四川司主事十四年  
覃恩由文林郎進奉直大夫二十年奉使徵揚州關鈔君寬  
以惠商負販乘舢舨出入者暨免譏察輸稅者俾自封投槽  
中胥吏苛斂之弊盡革復命監督通州中南倉旋入會典  
館奉勅排纂鹽漕二書二十三年 誥授朝議大夫明年戶  
部尚書科爾坤上言賦役徵解條目太煩請更造簡明全書  
天子允其請開局山西司君充纂修官時總裁光祿寺卿龔  
佳育持議謂州縣催科歲發由單分壤地之則使民知輸納  
之數法至善也惟因畿輔撥補地畝歲有更易而江浙稅課  
起運存留條目繁瑣近例有司必合計州縣之田刊入由單  
尾數稍有不符動行駁改名為易知在百姓實難知請米數  
止升合勺銀數止分厘毫自秒撮絲忽以下悉刪除之而升

秒為合并絲為毫斯勘算易明賦額仍無虧損乃更定由單  
式式未定而佳育卒計部在官人胥動浮言以畸零數不可  
除古未有議刪去者朝士多惑其說於是給事中楊周憲特  
疏請勿更

天子下公卿議君作論一篇援唐元稹當州所上狀中云斛  
止于合錢成于文在百姓納數元無所加于官司簿書永絕  
姦詐是則昔人已昌言之且米有圭粟粒黍銀有微塵纖沙  
入之權量莫辨其形鏤諸黎棗徒繁其目況會計凡析一為  
三者悉數之不能終窮佳育議是事雖不果行盈庭莫能難  
也又明年

天子需爭臣試三十三人于

保和殿擢君戶科給事中君

上言會典與紅本相表裏故事內外章奏付內閣典籍廳儲



藏歲久無隙地因貯科房往往散佚又各部司簿錄有第載國書未譯漢文者除二十五年前已經纂輯外宜滿漢對譯彙送內閣以爲異日續修地

天子允行旣而銜命勘河還臺班有與君忤者劾君父子各占籍以仕吏議落職久之補國子監學正君好學善與人交夙有知人之鑒分校山西鄉闈拔馮給事雲驕又賞識錢府尹晉錫汪編修灝于未遇時每當賦詩酬和袞袞不休疊一韻至万首所居寄園考定爲月張園故址濬池累石分布亭館種花木海內名士入都恒留連不忍去君脫略禮數過者不知何者是客也所著書有續表忠紀寄園寄所寄錄音韻正譌徽州府交城縣志詩彙尤多俱鏤版行世若交山平寇本末則其友吳興夏駟紀其事爲一書君年七十有九終

于京師卒之歲康熙四十五年二月朏也娶汪氏 誥封恭人子三人道數貢生候選儒學教諭景從山東布政司參議分守濟寧道景行康熙丁卯舉人內閣辦事中書舍人女一人嫁國子監生戴嘉猷孫男一十二人繼掄歲貢生繼扞康熙己卯舉人畢元附學生抗繼撰國子監生餘幼未注士籍女九人曾孫四人君之歸卷也景從先卒景行卜地于某原葬有期矣來請銘嗚呼君才傑也宰百里之邑積年未靖之寇犯虎狼之穴剗除之其智勇有不可及者而又詳于政典使久居諫垣言天下事閭閻惻惻何必不如古人乃以微罪去位一官左謫徒令仰屋梁著書以老不亦可惜也夫且徽州士族多流寓四方寄籍取科第即如先儒朱子本婺源人而紹興十八年同年小錄注籍建州建陽縣羣玉鄉三桂里



彼夫城陽昞橫四子昞守墳墓香居徐州桂居幽州焜居華陽前史不以為非由是推之君之父子似乎可逭吏議也已  
銘曰

宰山城枹鼓鳴探赤丸吏不驚去劇賊枹鼓息陟考堂譽超特入諫垣進讜言嗟青蠅止于樊官雖左賓滿坐人裸裎焉  
浼我酒百船詩万篇留述作通都傳伊人逝孰譚藝音徽亡  
哀輓繼筮兆基作銘詩訂君實無諛辭

鄉貢進士魏君墓誌銘

君諱坤字禹平別字水村世居嘉興之魏塘今之嘉善縣也  
曾祖考某祖考某考某雖不仕鄉黨稱善人從祖吏科都給  
事中大中忤奄寺受蒙蔽刑死詔獄世父學泚以哀毀卒苦  
次故言忠孝門者首魏氏君十齡草今文弱冠兼攻古文詩

詞家有田二十畝不足供饘粥父器除游京師入太學京師  
責人延君授經教其子既而客中吳與嘉定陸徵君元輔海  
寧陸處士嘉淑訂忘年之款詩詞日益工尋就試橋門撰石  
鼓賦國子師交賞擊以為絕倫也屢試有司不利乃託迹賓  
幕東游歷下謁孔林南入楚粵西浮彭蠡淹豫章年五十有  
四始舉鄉貢進士兩與計吏偕赴禮部仍下第歲乙酉復書  
驢券北上以歲除前一日抵真定之南關寒甚擁爐捉酒乍  
飲三爵聞一嗽而君逝矣太守寶應劉君中柱君之故人也  
哭君子簣下質明視其斂含載以輻車歸其器于是君之子  
錫琦錫璉將葬君子遷善鄉之東蚤圩凶服來請銘嗚呼君  
之學叩之而不窮其修辭動中事會所填樂章被歌管悉合  
于律宜其有浙西才士之目舉于鄉謂晚且達矣乃反速之



死于道路天乎人乎若其持已正臨財廉非其道一介不以入懷非其人近乎膩而不污可謂有君子之守也已君生于某年月日卒于某年月日享年六十先娶陳氏繼娶王氏有子二人孫男四人女二人所著有倚晴閣詩鈔秦淮雜咏歷山唱酬集粵游記程詩水村琴趣多行于世銘曰  
魂兮歸來北方不可以久留些反葬于鄉樂哉斯丘些將詩可傳抑又何求些

歲貢生程君墓誌銘

歙縣程君諱浚字葛人一字肅菴通經史百家之言寄籍杭州補仁和縣學官弟子屢試不利以歲貢入國子監居歙之岑山山形鐵峻特立新安江中為一鄉屏障君董工治樓榭繚以垣牆守望相助草竊莫敢窺又新宗祠以睦姍合族姓

通其有無少出嗣世父晨餐夕膳事二人盡歡且眷戀所生終身孺慕親亡以兩房考妣合葬于一塋築丙舍墓旁歲時膾臘禮拜上食如生存榜曰侍初堂友愛昆弟無間言交友重然諾不因燥濕輕重能為人釋紛嘗陳亭戶疾苦于

至尊前顏色不少懼里居逢寇警率鄉勇防禦寇退官軍牧馬于郊村民供芻茭不繼君言于主帥旋師客安吉茶陵兵變有司苦無備君從容代為區畫上官允其議城得全君歸理家務然不廢學兩淮都運司志自徐鵬舉宋廷立後續者無人君分門編輯頗挈其要暇輒治方藥療有疾者所活甚多以是閭閻無貴賤咸稱君善人君以明崇禎十一年十一月初一日生卒于康熙四十二年十月日享年六十有七曾祖某祖某考某本生考某均不仕娶吳氏子四人長喈中康熙己丑



進士次啓次哲俱候選州同知次鳴國子監生女一人嫁國子監生汪琮孫男八人女六人君既卒歛諸生百二十有七人合辭請以君入鄉賢祠下上之論交孚乃設粟主送入祠將葬君之季子鳴請予銘其墓銘曰  
不以爲人後而孝衰于親不以身不仕而善諉諸人庸言紳紳庸德循循祀瞽宗兮賢序卜吉壤兮桑津若稽古昔庶追蹤于叔度元考之倫也乎

嘉定張君墓誌銘

嘉定張雲章既合葬考妣于先世之兆率諸弟乞秀水朱彝尊銘其藏雲章才士也以貧游京師適貴人館願得生稱弟子不應歸謁節使思強其在門終不應也以是屢試有司不利歸愈貧然其守己益嚴義利之辨動以古人爲師自事親

而外孝養祖考妣盡子職蓋張氏世以孝友聞由來遠矣志之曰君諱履素字子旦一字震來七齡器母父禔授以四子書通一經工楷書弱冠補縣學生奉繼母如母友愛諸弟田產僮僕恒推與之娶李孺人武英殿中書舍人允新之女嫺壺行君喜得內助晨羞夕膳克承二人歡魚菽之祭歲時以禮舍人嘗以珠二索計百顆遺君大者重一銖君初不審視孺人亦不以耀首也會君坐奏銷逋賦尾數未輸除名悒鬱不自得年四十四病卒孺人教諸子力學躬治紡車脩祀事逾謹曰祭大事吾家婦也其可忽諸賓客至必供雞黍舍人珠既封完屢空閫以內無交謫語雲章生時孺人夢大星墜于懷占者曰後必顯久而名不登仕籍孺人安之曰命也君沒後孺人力持門戶四十餘年以康熙四十六年月日終孺



人有子五雲章雲蔚國子監生雲從雲揚縣學生雲縉葉儒  
女子一贈孺人壻內閣中書舍人朱文龍孫男一十六人女  
八人曾孫女三人銘曰

凡民器度丘隧墓大夫正其位張南渡徙姑胥稱万户江橋  
居依仁鄉橫港里祖居中昭考妣卜習吉筮協從銘貞石埋  
桑東

歲貢生潘君墓誌銘

鄉貢進士烏程潘麟舍舟謁予蹲賓橋畔請銘厥考之墓問  
其門世居縣之匯沮里高祖可賢奉政大夫知合州事與兄  
太子少保工部尚書季馴同舉于鄉者也曾祖某祖某考某  
均不仕問其出處少補學官弟子晚充歲貢生職當授儒學  
訓導未銓問其年生崇禎七年月日卒于康熙四十三年月

日問其撰述何書則有易解春秋傳考家禮小學外篇天文  
星野辨方輿曆法錢法鹽法備荒法諸書律呂志河渠考花  
月田家曆東齋隨筆又以儀禮經傳通解經朱子草創未成  
足本思取先後鄭氏孔氏賈氏王氏衛氏敖氏諸家會粹爲五  
禮條目繁重一手未果論定也富哉立言矣乎今士習曰下由  
山長旣廢司教者罕得其人栗栗少年目不識九千字擁臯  
比秉木鐸師嚴道尊之謂何惜也君之學術經六藝緯三才  
未沾一命以樂育多士天實爲之嗚呼悲夫君之學一主乎  
敬行事必告祠墓與朋友交長筵廣席衆或讙呶侍者見其  
以手畫膝作敬字人或負已無愠容施于人無德色言必踐  
善必躬行嘗論學于家其子問朱陸異同優劣君曰學者宜  
收拾身心慎勿道聽塗說業日修得失自見先儒優劣辨之



不羨毫釐與我何涉邪其于門弟子請業亦未嘗高談性命也君年十二開剃令下髮落輒以尺紙裹之齒牙爪甲謹藏之笥沒入周身之具生平敦睦同氣善難悉書蓋潛德勿耀幽宅不可無銘者已銘曰

君之居在苔雪字東暘諱開甲讀父書通六經曲臺禮尤研精不矜名不嗜利孝于親友昆弟廣述作何紛綸去者疵歸乎醇銘君藏列其目俾名山得著錄君四子長曰麟叔也夭仲季存君善人宜有後勒吾文表耆舊

徐州蕭縣儒學訓導樂君墓誌銘

維揚有欽奇磊落之士樂君諱又令字允諧一字介冰少能文學使者試童子拔置府學名第一其爲人孝弟廣交友輕貨財闢菹圃京江中焦山障其下芟荷葭茨浦樹圍之數重

有橘獨立結實青黃足當洞庭百頭暇招番禺屈大均賦詩宛平韓畱援琴鼓羽化之曲陶然樂其志也旣而海鯨深入戰後廢爲牧馬之場乃移居江都郭東八十里築洗心亭雜樹花柳比于故園風景略似乃講神仙服食之法成都費密爲作記君嘗一至京師以歲貢生入國子監選人按籍除君徐州蕭縣儒學訓導而君堅不赴也居家遂潔白之養父器廬墓三年因徧覽青紫囊書兆基考宅家祭立宗子主之通族墳墓咸爲修治戚懿貧不能昏器者必資以私錢曾無水旱燥濕鄉鄰鬪者以片言釋其爭蓋君之爲善不倦如此君以明崇禎十年月日生康熙四十五年月日卒享年七十配杜孺人子十人男四人長經內閣中書舍人先君卒次緯江都縣學生次統候選儒學教諭次大維揚州府學生女六人



一適江都縣學生蔣旼一適揚州府學生陳琴一適國子監生高鼎蔚一適候選儒學訓導湯有斌一適江都杜德馨一適歲貢生郭元銳孫男十一人長官聲揚州府學生承重服三年喪者也女九人曾孫男二人君晚自号悟賓道人擇地于攝山戴家庫題曰悟賓歸宿處戊子正月既望井樽葬焉銘曰

舍儒官師老氏吁嗟樂君葬于此  
文學鄭君壙誌銘

君諱珙字原道更字隨始姓鄭氏世居嘉興縣梅會里里故無巨室數門才者曰西毛東鄭鄭氏有鄉貢進士知興國縣事諱士奇者君之世父也曾祖某祖某父某三世均不求仕君少治春秋既而嫉胡安國傳義之非投牒更治詩家無田

產授生徒自給所居破屋三間垣牆不蔽井闔竈舩紡甄畢聚一室客至呼主人闔門而與之語率以爲常每文會賦詩君堅坐不作間擬樂府音節出入漢晉間一及諸經疑義講說紛綸闡前賢所未發以是問業者漸多束脩之入積累十金或勸君營什一之利君乃畀里人褚已浮舟于泖販吉貝花中塗爲盜所刦已還語君異日必償君曰盜劫子吾責子償是吾亦盜也子勿復言鄰有曹甲貸君白金二鎰賣藥于肆以甘言養其親終歲子母不納或諷君收其藥肆君曰甲藉是養其親匪利我財共子職也封其肆是奪之食傷孝子之心吾弗爲也由是人皆目君長者貴人延君訓其子推大宅舍之居數月語人曰華門圭竇吾素安之此非吾寢處地竟辭歸久之家益貧冬無衣脚或不韞然終不以告人年七



十有五以疾終娶崔氏先卒子三人孫五人貧不克葬族人謀率私錢瘞君乃書君言行納諸壙系之銘曰  
子非墨氏之徒而葬之薄也猶勝保而委諸壑也嗚呼斯命矣夫

曝書亭集卷第七十七

曝書亭集卷第七十八

墓誌銘

五

中憲大夫知思州府事陸公墓誌銘

去平湖縣治東六里五行涇有丘隆然為故中憲大夫知思州府事陸公之墓公諱世楷字英一別字孝山曾祖考長庚中萬曆八年進士累官南京通政司使進兵部右侍郎祖考啓麟國子監生以孫萊貴贈通議大夫內閣學士兼禮部侍郎考濬睿宣府推官始封內弘文院中書舍人累贈通議大夫內閣學士兼禮部侍郎妣譚氏山東布政司參政贈太僕寺卿昌言之女累贈淑人公少補學官弟子有文譽順治五年以選貢生赴吏部除平陽府通判又四年同知登州府又

秀水 朱彝尊 錫鬯



六年遷知南雄府事後十九年丁父憂服除補思州知府蓋  
先後視府事二十四年未得遷告歸四年卒時年六十有  
五公之判平陽也甫至而姜瓖搆亂遠近蠢起應之平陽被  
圍守以下局縮不能畫一策公貸粟于富民籍其丁壯登陴  
固守百日而圍解旋誘降其魁渠釋其黨師後大饑人相食  
公為粥食餓夫馬周于郊市辨民色先後給之餓者全活其  
在登州海寇揚帆猝至將逼城下公立設守具率舟師禦之  
寇乃逸去時叛帥海時行剽剝州縣僭稱王以公知兵事戒  
勿犯境又登有嫠婦夜為盜所殺鄰里訐其媳有所私慮事  
露殺姑滅口公攝縣事察其冤求殺人者不得禱于城隍神  
神夢一馬騰蹕不休晨徧呼死者戚懿嫠婦有妙子為驛卒  
公疑焉訊之卒言殺人夜投牒入府公念投牒時日有文簿

可稽取驗之字屬改竄卒乃引服蓋卒初意行竊方入門嫠  
婦突出猝加刃焉媳實不知也南雄嶺嶠門戶疆理初定平  
南靖南兩藩王並駐廣州羽檄不絕于道部將更替出嶺一  
日筮死七人公馳見帥論軍士罪有戴孔雀翎者二人入始  
興山自稱平藩侍衛發民鑿礦民盡恐公往詰曰王雖尊不  
得擅役吾民今不使太守知詐也遂縛二人送廣州王不敢  
問黠僧與平藩暱結精廬府郭外誘婦女入鎖其夫後圃而  
姪其妻閉置者十餘公詞知之僧故拳勇手一梃百夫莫敢  
近乃詭言營齋延之至入門門焉者棖闔及堂階則胥隸畢  
集縛之以前僧瞋目呼無罪公先時已別遣捕卒盡執僧廬  
所藏婦女至庭下僧辭窮公斃之杖下邦人皆以為快嶺南  
俗好訟公曲喻以理赴愬者漸息暇築天峰書院課諸生温



鏐王漢等講學買田以饒之去之日老穉拒輪遮馬不得行  
立祠府治東士民春秋社祭其莅思州值王師凱旋軍馬  
絲繹府舊設平溪清浪二衛後劃歸湖廣而站夫猶循例派  
協公請于上官得免繼遭旱稞斗米二千錢吏請開徵秋稅  
公不可民德之輸者過半前守以增賦得遷公覆丈以弓無  
餘壤請反其舊又持議謂思州雖列爲府所屬止四土司居  
民附郭不滿百家丁糧不及一小縣而又商旅不通營伍不  
設供億難與他府齊宜仿黔西平遠近制降爲州隸之鎮遠  
而以施溪一土司割附銅仁可救一方之困議未允公乃以  
病引歸矣公孝事父母友愛諸弟篤友誼能通財不以生死  
爲厚薄家無美田宅遇人有緩急必應未嘗責報歸田後足  
跡不詣公府有司行鄉飲酒禮請公爲賓辭者三然後赴晚

結方外社與禪人通復今釋縱譚清淨理通復工于詩今釋  
者前進士仁和金堡也公守南雄日爲治丹霞精舍以居公  
歸後舍之于東園遂終老焉公于詩歸風合雅不墮叫蹶之  
習文格醇正手輯南雄思州二志事必徵信集若干卷存于  
家公生某年月日卒于某年月日配張恭人生某年月日卒  
于某年月日合葬于墓子男八人咸有文行一嗣仲父某也  
女五人俱嫁士族孫男九人女二人銘曰

嗚呼古之循吏久于其官政以不煩民以不冤公于黔于粵  
除惡必先濟之用寬客至張旌廬旅居船士也討論席研壺  
餐志其山川申畫土田有德有言溢于炎屢宜爾子孫克昌  
厥文美哉鮮原秀木丸丸罔有後艱

許封君墓誌銘



晨有造吾門剝啄者童子以告眎其刺則給事中山陽許君也延之入布衣官屨請以弟子禮見主人固辭稽顙而後言曰志進不幸連遭父母之器鮮民之生分不如死茲日月有期將葬惟先生之文無諛辭庶取信後世敢請銘按狀公諱某字信孚其先自吳徙于淮世居山陽縣之東村曾祖歲貢生某祖鄉飲賓某考督師參佐某公讀書通大義不就試居父喪自初終及葬一準于禮母病視藥餌惟謹祭必致齋家法嚴肅不飲酒不圍碁無嬉戲之具教諸子以義方少不當意輒施夏楚性質直負氣不肯下人恒慷慨自許曰人生不行萬里豪氣何由得伸乃南浮江漢北走燕齊西逾河洛歸治祖圃將老焉既而就給事君鐵嶺官舍因東涉遼海視其子行取入京師補戶部主事改授兵科給事中旋掌禮科給

事中印加五級公初授封文林郎進封朝議大夫配周氏慈惠有壺儀初封孺人進封恭人子男三長給事君志進也次某次某俱國子監生女三俱配士族孫男三女五尚幼公及恭人之還里也給事君方擬奉潔白之養而恭人以康熙四十四年五月先卒公旋以四十五年正月病終宜給事君之擗踊號泣深以不幸自傷也以子論之士惟貧賤得顧父母之養然無升斗之祿糠粃不飽雖欲啜菽飲水盡其歡難矣若一登仕籍官守言責拘繫不得自由聞親器逾時奔者有焉不得奔者有焉彼夫墨衰經以治兵奪情而秉國政豈其初心不作孝哉殆亦時勢迫之貪位之念既萌立身一敗遂不可以爲人子今給事君以言去國眷戀庭闈朝餐夕膳病奉藥裹器視斂含凡附于身周于棺槨者無不致其誠信勿



重困又踰沙漠送戰馬至大青山不敢告勞無何郡檄下督  
責文書過當君素寬和及是忿甚因得心疾不復出廳事然  
庶務能舉大綱無闕冗者閱三年乃請歸歸六年遭母崔淑人  
器疾益甚又踰年遂卒予昔游太原嘗一至交城矣縹馬城隅  
登萬卦山日暮風雨作遂留宿僧舍夜聞擊柝雜魚板聲山  
僧竟夕不寐晨起鋪眉苦眼有憂色詢之山去縣西北五里逼  
寇宄窟穴其徒慮驚客也其後錢唐趙君吉士宰是縣請于  
上官調兵勦平之然遺種尚未盡及君爲政幾于臥理而在  
交九年邑無桴鼓之警民樂其業以是信君之才爲不可及  
已君嘗依其兄養痾官舍暇探四明三衢山水之勝間賦近  
體詩小詞清疎秀逸頗入作者家數惜乎短折未克升堂入  
室也君生于康熙己酉十月二十五日歿于乙酉十一月三



之有悔焉而且吏不呼其門朝不釋其服孝子慎終之禮斯可勿憾毋亦不幸之幸也與銘曰

淮之水悠悠得地而流有崇者丘是爲太岳之裔給事中之考妣合葬于是幸哉有子

知交城縣事靳君墓誌銘

君諱治青字東表先世自歷城徙遼陽曾祖某贈光祿寺祖某贈通政考弼通議大夫兵部職方司郎中君其第三子也年十三器父習舉子業服除試不售補筆帖式以瞻敏稱出知太原府交城縣事交故巖邑号難治君至興教化勤撫綏開誠布惠民乃胥悅歲乙亥平陽地震人死者萬計君奉調勘災掩骼賑飢殫竭心力會禁旅北征道出雲朔奉軍符協辦糧草都縣率多浮派君獨斟量緩急極意節省民無

重困又踰沙漠送戰馬至大青山不敢告勞無何郡檄下督責文書過當君素寬和及是忿甚因得心疾不復出廳事然庶務能舉大綱無闕冗者閱三年乃請歸歸六年遭母崔淑人登萬卦山日暮風雨作遂留宿僧舍夜聞擊柝雜魚板聲山僧竟夕不寐晨起鋪眉苦眼有憂色詢之山去縣西北五里逼寇穴窟穴其徒慮驚客也其後錢唐趙君吉士宰是縣請于上官調兵勦平之然遺種尚未盡及君爲政幾于臥理而在交九年邑無桴鼓之警民樂其業以是信君之才爲不可及已君嘗依其兄養痾官舍暇探四明三衢山水之勝間賦近體詩小詞清疎秀逸頗入作者家數惜乎短折未克升堂入室也君生于康熙己酉十月二十五日歿于乙酉十一月三



日妻孺人李氏故安徽巡撫都御史諱鈞之女柔順有婦道  
生康熙丁未六月二十六日歿于乙酉十月十三日子寶齡尚  
幼經紀君之器而合葬君夫婦于某原者君之仲兄寧波府  
同知治荆也銘曰

一朝之忿疾不可醫胡才人之不達而命止于斯吾銘幽宅  
太息齋咨矧伊兄弟奚其不悲

儒學訓導倪君墓誌銘

同里倪君識之四十年君時授徒城東竹亭橋即其人恂恂  
有君子之容觀其文悉本經義君早見知于有司九試場屋  
不利年四十八以歲貢入國子監諸城李侍讀澄中讀其  
廷試卷亟薦之榜發以儒學訓導待銓是秋赴順天鄉試復  
不遇君乃焚所作詩文就子宣南坊邸舍講經義學爲古文

辭其說經不專主宋儒謂易有君子之道四不當專主爲卜  
筮之書又謂尚書古文可疑武成紀日與名詁顧命異益可  
疑又謂孔子說詩蔽以一言曰思無邪淫奔者豈暇作詩而  
孔子取之當依小序爲是又謂大小戴同授禮不當偏廢大  
戴氏宜去月令存夏小正去明堂位存明堂投壺則參用之  
又謂說春秋者紛綸皆害于義孫復胡安國刻深尤甚又謂  
羣經縱有錯簡宜仍其舊宋元諸儒多逞臆見更易未免侮  
聖人之言其持論頗與子合因留不去取韓嬰鄭康成以下  
詩說五十家折衷而抄撮之旣而子移家具寓宣北坊轉徙  
斜街花市君授經宣武門內弟子著錄者日衆乃避跡西山  
君精于易卜斷卦奇中又善青黃紫囊之術撥沙發水偶爲  
主人相度聞者造請日繁君曰吾術期避禍爾諸公欲以化



者要福不可得也先是有例選人入貲者得先除君念親老思謀三簠以養束脩之入悉輸之官名當注除目矣或紊其籍歷數歲名反居後遂引歸歸事其父飯糲焚枯怡然樂也逾年痛其弟天無子遂成痼疾歲在丙子筮之得乾之同人曰此六月之卦也吾其以是月終乎壬辰映果卒年六十有一君諱我端字郢客初名野王字古期先世嘉靖中自紹興避倭亂徙嘉興曾祖文遇國子監生仕爲廉州府經歷祖某早卒祖母胡持苦節授君毛詩孝經者也父某不仕母張氏妻吳氏子二人仁存國子監生鳳皆海鹽儒學生女一人壻國子監生沈某孫一人女孫一人君事祖母父母孝友于諸弟無間言又急人之難故人有孤不負其託平居義命自安客或憫其不遇秋試以關節進拒不受又臨財廉口不言利

婦翁念其貧贈以負郭田六十畝君固辭翁沒亟還外家券人有所負不責償其人內媿久而獨完其逋或以計中君君亦未嘗宿怨其學以正心術爲本博通經史尤邃于詩彙雖未就言詩者莫有過焉間與浮屠道士還往然臨終誠其子不得作佛事其持正若是嗚呼今之爲校官者許以貲進黃口白面後生目未覩九經之文擁臯比自詡師表者不可悉數以君之學俾登講席庶幾合乎古之書院山長足爲士子圭臬而卒不得試所長老于逢掖死不亦可惜也夫于其葬宜有銘銘曰

悲  
譬彼積薪先者後之孰是人斯不試其才天乎祝子子寧不

文林郎知舒城縣事朱君墓誌銘



里有同進士出身知廬州舒城縣事朱君諱振字嗣宣一字  
千仞所居州東灣在清香樓左蓋府治即秀州治故名君孝  
父母友愛諸弟睦族人以兄事子其論學以主敬爲本文尚  
體要去枝葉歲乙卯受知崑山徐公秉義舉鄉試第三人已  
未試禮部釋褐于太學丁卯籤除今官戊辰冬十月 覃恩  
授文林郎壬申六月卒于官舒城自崇禎壬午遭寇亂井邑  
丘墟入

皇朝雖加意安集然居民多鴈戶遇歲凶輟耕而走催科不  
前又路處劇駮送迎官長鮮暇日俗好鬪士多廢學君至首  
葺明倫堂月課士子以經書義均賦稅清保甲勸農桑息爭  
訟凡害于民者次第去之莅官之明年武昌兵變 王師有  
征由舒入楚民大恐市肆皆閉君曰師行糧食絕其食是導

之掠也令大開縣門悉民間市肆所有物徙置兩廡君立堂  
下俾胥史輿隸操斤權具斗斛東芻芟洗盆甕君平物價而鬻  
之兵獲醉飽歌舞而去先是上官欲調江寧兵戍英霍府  
檄下俾封桃溪運米船以載典史請任其役君曰無庸舒非  
必由之道也旣而府檄復下令釋所封船人乃服君善料事  
縣多槁壤水利久廢不治舊有七門三堰十塘漢頡羹侯信  
始造至魏揚州刺史劉馥修復之溉田二万亩迄于明知縣事  
范得民劉顯更事修築民共其利後爲勢家曲防遏之使不  
下君循覽故蹟毅然以疏濬爲己任諏日鳩工畚鍤聿興克  
復其舊舒民布穀旣獲赤白相雜計部以所輸米色不純行  
令赤白分貯山農苦于分棟君力請漕督援河南事例免分  
貯其言曰身爲親民之吏而民隱不知罪已不勝誅矣若知



而隱忍是視一己之功名為重而萬民之怨蹶為輕義之所不敢出也漕督嘉其強項允咨計部焉君治舒五年盡心民事不遑暇日以勞邁疾終于官舍囊無長物舒人祀之名宦祠且率私錢設祭道左執紼泣下者千人既歸器以康熙四十二年十月葬于嘉興縣北辰字圩祖塋之左於是鄉之父老子弟謂君循吏宜配食鄉賢之列眾皆曰可有司得請乃造粟主送黌宮君之曾祖某祖某俱不仕父某敕封文林郎舉鄉飲大賓年九十而卒母張氏贈孺人繼母及氏封孺人妻凌氏亦封孺人子三德溥嘉興縣學生修永益求俱國子監生女二一嫁王上舍藩一嫁吳上舍瓚孫男二人尚本向東女二人嗚呼今之号稱能吏者吸民膏髓以善事上官得拔擢入臺省部曹比比也若君之宰邑目不知有上官第

以勤民為先務或惜君脆促未盡其才然使再假之年彊直自遂難乎免于上官所劾是則君年之不永獲全其名未可謂君之不幸也已曩者君謁選人于京師就予舍館相與論古今得失聞予一善言喜動于色有過未嘗不相規也蓋知君之詳者莫予若德溥兄弟請誌君墓遂不復辭銘曰  
悅以使民民功曰庸胡不報最而遽凶終邑有俎豆里配馨宗君可勿撼反葬家江

文學咎君墓誌銘

咎氏之望出太原又出彭城其自陝西三原遷于宣州則宋靖康間諱某始也自宣城遷懷寧則明洪武初諱某始也君諱某曾祖曰某有隱德祖某嘉靖癸酉舉人知金谿縣事考某縣學生員君年十八補學官弟子以文試有司輒置高等



名藉甚于時貴池吳應箕次尾宣城咎質無疑交譽君延之  
入復社復社者東南知名士相結持清議拒閹人黨與東林  
卿大夫聲氣相附和者也應箕實爲倫魁君辭不可謂必有  
鉤黨之禍未幾果然福王南渡馬士英阮大鍼柄用濫以名  
器假人江東諺曰職方賤如狗都督滿街走而大鍼之母君  
之姑也一日君往省焉大鍼留之邸謂曰弟欲官乎君不應  
曰道匪遠也池州太平需同知府事督餉數月可遷爾君以  
不習吏事辭遂亟引去大鍼旣死平生藉其勢者或竄匿或  
縲紲繫之或遇于道至唾其面而君獨以遠權力一無與焉  
人曰咎君可謂皎皎素絲涅而不緇者已君性孝友六齡繼  
母王撻之無完膚幾絕婢奔告其父大憾君曰母撻兒教  
兒也家人聞之盡流涕及父卒執器盡禮讓產及其弟鄰里

賈之有昏器必助之君始居懷寧縣北荻坂廬舍爲寇所焚  
乃徙桐城棕川之梅渚晚結茅杏花村筮之得坤之萃曰括  
囊无咎无譽因自号晚訥書其壁曰飽吾嬉焉爾臥吾寧焉  
爾醉吾陶焉爾又曰惟慎無憂惟忍無辱惟靜長安惟儉  
長足君子學博綜經史旁及醫藥卜算之書老而愛釋典恒  
語其子曰吾前身恍惚在深山草閣中積雪千丈有龐者叟  
行送別執手不能舍來自雪中吾生矣吾沒之日亦必以雪  
夜及臥疾天大雪擁被起曰吾其逝乎遂卒君妻阮氏曾祖  
鸚巡撫浙江都察院右都御史祖以臨欽州知州考士鏃銓  
授府推官歲乙酉叛卒屠城阮氏遇賊以刃脅之不從身被  
重創猶罵賊幸不死享年七十乃卒子男二人茹芝茹穎女  
二人孫男三人女六人曾孫女一人銘曰



適來雪也適去亦雪也夫子之潔也琢銘幽宮永勿涅也

文學曹君墓誌銘

君姓曹氏諱山秀字中峽嘉興人祖父皆不仕君幼習詩補縣學生員歲乙酉嘉興城破予年十七依外父馮君避地練浦塘東君世居幽浜予兄事之有吳君蒞者人目為狂生家橫涇水曲相去各二里而近中道為五兒子橋三人者暇輒相訪糲飯一盂肉一柈酒一注留必醉飽日將暮悵悵不忍別及橋徘徊橋上縱論天下事有不合吳君瞋目視大譁唾及人面橋畔叢祠有病僧聞之駭蹒跚出窺戶牖則見笑啞啞不止疑始釋也既而予同君讀書烏木橋村賦詩日酬和君有詩曰魯連思蹈海申徒欲沉河猗嗟古之人不為世俗阿俄而盜劫主人居君有弟從學善泗水盜至遂投河君亦

亟投河沉浮于水者數其弟竟死而君不善泗水反得不死鄉人以為詩讖君痛弟故自是不復作詩專治舉子業弟子從之游者漸衆館真如僧舍僧寂月通儒書能詩子每偕吳君造君則寂月亦至劇談移日不去夜坐彌勒龕琉璃燈下恒達旦不寐寂月語人曰與諸君譚假令載筆記之即法言中說也聞者怪之不顧予既客游四方久之吳君亦入楚轉客于黔以卒未幾寂月亦逝君十赴省試不利乃附載運船訪子京師會予奉命主江南鄉試君至則大困旅食淨度寺著散懷錄自遣比子還則君已病遂不起予往視其斂兄子某扶其柩還半塗亦沒淹數月始達于里子某葬之先世之原君娶某氏繼娶卜氏卒時年六十嗚呼方子與君田居往還晨夕者寥寥數子相見肝膽畢露妄謂天下無不可交之



人無不可言之言其後所游日廣夷憚怨隙皆非吾意所期始信久要之難悔少日之失而轉惜舊友之亡為可痛也銘曰  
生吾以為兄死吾與為銘人不如故先民豈欺我哉

張君墓銘

南徐之州斗分野大江浮浮繞城下吁嗟張君老環堵易緯蒼牙詩媿雅曉吟午誦夜膏火稽之于古闢學舍包咸韋昭庶其亞身雖不遇行則果貽厥子孫三獨坐施于有政無不可譬諸江流千里寫發源自岷者君也有崇斯丘神所妥斧屋既封樹粉櫝納銘于幽告來者

高士李君塔銘

高士李君者自上海來平湖割西宮道士之樓居焉以醫藥

自給年七十病卒君先世曰尚袞曰中立皆舉進士尚袞未授官中立為大理寺右評事又有立武功與倭戰沒者建祠南匯城代為士族而與君游者多不知其門闕年二十間道走桂林名書仕版而與君游者終不知其官資君娶伍氏再娶殷氏鞠氏先後生子九人悉夭而羣從皆學官弟子與君游者或不知其有家室子姓於醫受業于季父中梓材中梓撰方書一十七部君補撰藥品化義醫學口訣脈訣彙辨痘疹全書四部刊行之有延之治疾者數百里必往視疾愈不責報或酬以金輒從西吳書估舟中買書不論美好由是積書三十櫝繞臥榻折旋皆書也與君游者相對樓下不知其儲書之富客過無分出處貴賤怡顏相接暇則坐輕舟載花郭外藝庭前飲客酒必自遠致山肴海錯饌必豐與君游



者不知庖爨何地而君意所嚮何者為疎密也歲在丁丑冬  
十有一月子至平湖則君已疾革視之猶披衣起坐出所著  
南吳舊話錄暨所撰詩古文曰放鵬亭集并以  
付子且命弟子以所儲書二千五百卷畀焉其餘散去平居  
玩好一瓢一笠一琴一硯悉分贈友朋越二日終遺命弟子  
用浮屠法盛尸于龕焚其骨瘞之塋後二年訪君葬所則近  
在東湖之濱其友江某實治其藏焉弟子蔣某徐某請子銘  
以垂之永久銘曰

君諱彥貞厥字我生後更延古文夏字爰遁于野改字辰山亦曰  
寒村被道士服栖琳觀之側汎汎松舟而泝而游疾者熏灌  
或以解散有花有苗有甲有條步櫚兮道遙有經有子有文  
有史搖筆兮伸紙有肴有脍有藪有魚留客兮康娛嗟君之

窀穸兮忽自逃于釋兮嗟君之去故都兮委恒幹于東湖兮  
或疑羽流或謂僧伽視我銘辭其高士邪

曝書亭集卷第七十八



曝書亭集卷第七十九

秀水 朱彝尊 錫鬯

墓誌銘

烈婦楊氏墓誌銘

華亭之鄉伍胥浦之右有水曰璜溪陳氏世居其上烈婦楊氏者儒學生諱某之子給事中諱某之孫嫁陳某生三子一女歲在乙酉八月松江城破游卒乘勝至璜溪執陳某斧傷其首烈婦奔救其夫卒舍某執婦某得脫婦給卒曰毋縛我我走及汝卒信之比登舟遽躍入溪中死時年三十有一陳氏之僕有妻曰張惜匿葭葦中見婦死狀兵退其長子曰治年十二號于溪畔越二日婦尸浮溪面得就斂當是時游卒大掠溪上一婦投溪之東曰徽州商人孫氏之媪一婦投溪



之西曰儒學生孫諤妻顧氏三人皆完節死烈婦幼能讀毛詩孝經列女傳平居訓子女不輟舍傍有梅三十本皆其手植蓋至今存也治好學多材藝游于京師以醫自給將歸葬其母乞其友秀水朱彝尊爲銘銘曰  
溪之水沄沄若芥者墳於戲女子而烈如是旣活其夫乃捐其軀有子也賢壺行斯傳我銘于石南史是擇

蔣孺人墓誌銘

康熙二十有三年彝尊謫官居京師之宣南坊武進龔勝玉持束紡升堂再拜請銘其祖妣蔣孺人之墓彝尊老矣而文不加進恒自慙許之而未果作也後三年勝玉復謁予宣北坊固以請乃取其季父燾所爲行狀誌之曰

孺人姓蔣氏先世侯爵也自宜興徙府城曰某曾祖考也曰

某江西吉安府通判祖考也曰某國子監生考也年二十三歸葬其事孺姑以孝姑歿哭盡哀上膳繆慕無異事生者其持家以儉蒿簪布裘躬自操作相夫子三十年生產日益旣遭亂率其子士樞匿深村葭葦中士樞中溼疾殞叔子士黯亦殤越三年而寡孺人少知書能讀孝經列女傳教其子若孫讀書歲時脯臘修祀事惟謹門以內肅然睦于娣如族人器葬輒以錢資之有貸者靡勿與與不責其必償也孺人年七十季子士燕以治曆官欽天監歷科博士假歸於是五子及婦十孫咸奉觴爲壽鄰里以爲榮旣而士燕又死歲在己未孺人亦以疾卒享年七十有七子男八人女一人孫男若干人女若干人曾孫男若干人女若干人勝玉好學有文以國子監生知名一時昔河東柳宗元于其母盧叔妣陸伯祖妣



李皆不外求而為之誌勝玉宜古是師顧數請于予予則烏能詳孺人之壺行也系之以銘銘曰

祀也如宋也子楚也芊蔣諸姬文公裔封通侯陽羨里後徙郡世廡仕孺人賢為龔婦孝厥姑配嘉耦訓子孫勤莫比善必昌自今始蓼莪山樹粉梓井同穴葬于是勒吾銘庶垂久

朱孺人墓誌銘

先太傅文恪公有女二人其一作配臨安縣儒學教諭平湖陸君淪原彝尊之王姑也生子埜以能詩聞于時女嫁劉炳圖文恪公子女中孺人最少年十四嬪于陸氏族黨交稱其賢敬以事姑謙以接娣如儉以自處家人外內忘其為宰輔臣女也孺人生于萬曆三十八年正月日歿于崇禎十六年十一月日年三十四卒之日一女甫嫁子猶未婚也陸君悼

孺人不已遂不復娶獨居四十年及卒有孫四人曾孫男女七人於是埜與孺人之柩附葬于東湖之鱗圩屬彝尊為銘彝尊生時先太傅已卒是時曾祖王母何太夫人尚存孺人歲歸寧者再伯叔舅弟姑姊妹羅拜于堂猶記孺人貌言必莊行坐皆有矩度今老矣回首少日事若夢寐先人北門之宅曩之聚族居者已不可問及孺人之葬北門羣從少長零落殆半銘其墓不禁涕泗之下也銘曰

朱氏之先居商河之許贈少保者孺人曾祖祖同厥官太傅為父實相熹宗事在策府陸亦清門莊簡後昆夫也通孺子才逸羣齒雖不永後嗣則繁東湖之濱松柏在原兆基井棹孔固且安孰銘幽宅乃其歸孫

嚴孺人墓誌銘



常熟隱湖之濱隱君子毛翁居焉其繼室曰嚴孺人孺人者  
明光祿大夫太子太保吏部尚書武英殿大學士贈少保諡  
文靖諱訥之曾孫隆慶丁卯鄉貢進士承蔭中書科中書舍  
人諱治之孫國子監生諱枏之女年二十有三嬪于毛氏孺  
人生長高族既嫁卻綺紉金翠之飾簪蒿裙布甘與翁偕隱  
翁先有母戈甫昏疾篤孺人居姑巖所以致其孝者無不盡  
也翁先有一子三女孺人撫之若己出所以用其慈者無不  
周也翁于家祭折衷司馬氏書儀朱子家禮行之孺人潔治  
錡釜所以將其敬者無不專也翁從游錢尚書謙益之門勤  
學嗜古博覽典籍謂經術必本漢唐庶窮源得以津逮乃于  
崇禎元年開梨棗之局發雕經十三史十七子所居汲古閣  
下時諸務未中條理明年孺人來主中饋分命僉僕各執其

役黠勤之賓劖劂之工裝潢熟紙之匠各從其宜秩然有序  
則孺人內助之力居多自元典章用宋熙寧經義取士所主  
傳注率本淳熙諸儒明因之經生立異義者黜又以灑掃應  
對進退易古小學其後書數方名均置不講而識文字者寡  
矣挾三家村夫子兔園冊足以取高第縻好爵而有餘無事  
洽聞周見也翁深憂之力搜祕冊經史而外百家九流下至  
傳奇小說廣為鏤板由是毛氏鈔本走天下翁既沒孺人持  
門戶又二十一年其季子辰精小學傳寫諸家金石書畫記  
及古五曹九章算經思盡刊刻以行可謂善述先人之事者  
已翁初名鳳苞字子晉後更名晉別字潛在天啓崇禎間屢  
試于鄉不利兵後遂高蹈不出有子五孺人出者四曰褒曰  
袞曰表存者辰也孫二十人曾孫二十三人翁之葬也錢尚



書銘其藏矣今以孺人祔展率其諸兄之子來請銘銘曰  
裴宗五眷李族三祖志尚詩書相門之女河間汲郡抱經以  
傳隱君嘉耦其功媿焉同穴既封考宅永久我作斯銘竊附  
蒙叟

王淑人墓誌銘

淑人諱克榮姓王氏順天宛平人今保和殿大學士太子太  
傅兼禮部尚書加三級熙之女光祿大夫太子太保禮部尚  
書謚文貞諱崇簡之孫布政司使贈太子太保禮部尚書諱  
愛之曾孫太子少保吏部左侍郎山陰胡公諱兆龍之子婦  
河南提刑按察司使介祉之配也

世祖章皇帝時王公胡公並以翰苑受知備顧問侍左右兩  
公交好日篤同居禁近無間言既而胡公沒遺產甚薄公配  
劉夫人鞠育三歲孤比長延經師教之學脩脯必豐又睦于  
懿親日費恒誦持門戶甚力王公每歎其賢曰吾當以女爲  
之婦於是淑人年十五歸于按察君事姑惟謹不以生長富  
貴自矜也君既通籍爲工部營繕司員外郎遷兵部車駕司  
郎中以清白自勵俸入苦不支淑人拆花鈿易米鬻嫁具于  
市不少靳及出爲湖廣按察司僉事督理驛廩事務會

王師平雲南凱旋檣櫓轅馬絡繹于君治公務不遑啓居  
淑人事其姑彌謹明年君移官山東布政司參議督漕運駐  
德州未行而淑人卒卒後遇 覃恩誥贈恭人進贈淑人生  
于順治十七年十月甲寅沒于康熙二十二年七月辛巳年  
僅二十有三淑人產五女其三天謂按察君曰姑老矣宜亟  
見孫爲置妾媵二人視之若姊妹然及淑人沒舉子三人女



劉夫人鞠育三歲孤比長延經師教之學脩脯必豐又睦于懿親日費恒詘持門戶甚力王公每歎其賢曰吾當以女爲之婦於是淑人年十五歸于按察君事姑惟謹不以生長富貴自矜也君旣通籍爲工部營繕司員外郎遷兵部車駕司郎中以清白自勵俸入苦不支淑人拆花鈿易米嚮嫁具于市不少靳及出爲湖廣按察司僉事督理驛廩事務會

王師平雲南凱旋檣櫓轅馬絡繹于楚君治公務不遑啓居淑人事其姑彌謹明年君移官山東布政司參議督漕運駐德州未行而淑人卒卒後遇 覃恩誥贈恭人進贈淑人生于順治十七年十月甲寅沒于康熙二十二年七月辛巳年僅二十有三淑人產五女其三天謂按察君曰姑老矣宜亟見孫爲置妾媵二人視之若姊妹然及淑人沒舉子三人女



四人嗚呼婦德之難也貴則凌長才則嫉下蓋往往然矣淑人孝事其姑順事夫子而仁以逮下可不謂賢乎且匪獨淑人之賢亦以見王公門內之訓之嚴交友之厚而按察君伉儷之重自淑人沒後十年不更娶皆人之所難能也已銘曰以淑人之德曾不永年迴鸞有紙賁于下泉伐石于燕奪玉之白刻我銘詩可永無泐

孫恭人墓誌銘

戶部廣西清吏司員外郎休寧程君岳造子旅館奉幣稽首而曰曩者屯溪石橋之建先生記之以文道先君子為德于鄉里甚備今不幸先恭人器將合葬于某原卜兆有日冀先生一言掩諸幽敢以請子不敢辭迺按狀誌之曰

恭人姓孫氏世居縣之西山父處士某有五女不生男子恭

人最少嫺內則處士憐之及笄歸程翁子謙翁遠服賈買遷滁泗穎毫諸州恭人家居事舅姑盡力潔盤餐而能飭躬以儉暇課臧僕種紫瓜白菟蔬果繞牆屋夜督女婢篝火治機絞以為常惟教二子厚脩脯延名師講經義每放假叩以所學則色喜謀于夫子置祭田春秋聯其宗族又念所生之不起也別為祠屋立粟主俾二子陳俎豆拜焉調戚懿之窮者賻鄰里鄉黨之死器者至率水之隄屯溪之石梁動費金錢累萬恭人悉勸翁成之蓋翁固樂善不倦亦由恭人傾箱篋不少靳蓋所見者遠而所施者弘矣今世祿之家夫不以智率婦不以義從往往為之婦者輒制其夫夫亦甘受制而不知恥即為善之念油然而根于心而管鑰恒司于內雖銖兩之需不謀諸婦不可得由是失其初心者不少也惟浮屠道士



營造動以禍福惑愚婦人則施予者有焉以予聞恭人臨沒  
誠其子勿作佛事嗚呼恭人孜孜爲善若是特不惑于二氏  
此士君子所難能也已恭人生于明崇禎元年月日卒以康  
熙四十二年月日享年七十有六以 覃恩誥封子二人長  
即員外君次崙內閣中書舍人出嗣世父後女二人均嫁士  
族孫男五人女一人曾孫男一人銘曰  
德積于身寧責報于子孫然不爽者天徵信者文吾銘其藏  
豈惟以貽程氏之後昆

馮媪冢銘

嘉興縣治東南三十里曰練浦浦之東民居曰馮村村之女  
有終身不嫁年六十七以死者曰馮媪媪之兄歸安縣儒學  
教諭馮君也葬媪于君之宅西二十步而誌之以文者君女

壻朱彝尊方媪年少父母欲嫁之媪之言曰吾好直言而貌  
樸好直言必獲罪翁姑貌樸則不禮于壻嫁焉未有不困者  
也吾從兄嫂以居而送父母老何以嫁爲馮君憫其言不復  
強也媪之父母旣沒食于其兄者四十年君旣就官乃依子  
妻以居抱子子女甚謹予游嶺南歲丁酉正月媪以疾卒子  
妻視其殮殯焉子哀媪無祀爰封以土銘其藏在某年月日  
嗟夫婦人之義從一而終嫁而寡守貞宜也其或未嫁而夫  
死雖未從之以身守其言不改其節蓋世之所難能故或旌  
其門或表其閭則猶有名焉若媪之貞無得而名焉者也子  
嘗疑媪迷惑佛氏之言詢之馮君暨子妻則媪生平未嘗事  
佛異哉媪之所以自處也銘曰

猗女子之不字無非無儀瘞汝銘汝夫又奚嗟



葉嫗冢銘

葉嫗者乳子于襁褓者也子生四齡嫗歸歸九年浙東西大旱飛蝗蔽天歲饑人相食而嫗之夫適死因就食于家子家自先太傅文恪公以宰輔歸里家無儲粟先大父繼之益以廉節自礪知楚雄府事還力不能具舟楫至是先大父已卒先處士安度先生家計愈窘嘗至絕食從祖諱大定通判成都以蜀江米四斛貽處士米色殷而糲食之咽喉若中魚骨嫗不得飽乃流涕辭去十年之中凡五嫁而夫輒貧嘗語人曰安得十郎驟富使我老不復更嫁乎其言可憫如是十郎謂予也嫗年七十有一而死死之日後夫益貧予妻爲典衣買棺以殮越明年戊申予在濟南聞而哀之資其夫錢若干俾往瘞焉寄之以銘曰

婦人五嫁理則不可貧實驅之否誰依者傷哉貧乎乃至辱其身乎

曝書亭集卷第七十九



曝書亭集卷第八十

秀水 朱彝尊 錫鬯

行狀

徵士李君行狀

曾祖考應徵國子監博士祖考士標寧海州同知贈尚寶司  
丞考寅國子監生君諱良年字武曾初名法遠又名兆潢年  
三十乃更焉先世江陰人明洪武初提舉行千四者徙居嘉  
興長水上梅會里七傳至博士中萬曆元年舉人有詩名著  
澄遠堂彙彙司丞繼之有蒼雪齋集當同知寧海州事值冷  
口兵入圍城固守三月以勞卒而城陷巡撫右僉都御史曾  
化龍上其事得贈官君之考上舍以結客破家餽粥恒不給  
然必延師教諸子妣顧孺人佐之脯脩獨豐故君之兄弟咸



奮志于學君九齡能草時文十齡解賦詩既而上舍客死韶州家產益落鬻其故居兄弟並棲小屋君又喪偶就族人爲童子師子方避地長水偕里人詩篇酬和處士屠爨謂予曰子之才里中罕儷吾門有李生將來庶幾與子並駕乎子遂與君定交晝輒劇譚夜或襪被共寢四方賓客至則釀錢留飲相與論詩文流別議有不合難答紛綸聽四坐折衷而後已君既再娶始有居一廛集同里詩人聯句樓上君兄繩遠弟符與焉江鄉言詩者目爲三李時商丘侯方域南昌王猷定皆以所撰詩文鏤版于浙君覽之終卷曰是不難遂期子共作古文沿流溯源論次之於詩持格律甚嚴嘗抄撮詩中禁字一卷授學詩者繼乃舍初盛取中晚唐及宋元諸集別出機杼鏘洋淡沲極唱歎之致於詞不喜北宋愛姜堯章吳

君特諸家故所作特穎異予游京師轉客太原後二年君亦至都下無所遇留宣府予從逆旅見君期之復入都偕游西山題詩于壁傳抄者不絕一時朝士爭欲識吾兩人每名客客輒詢坐中有朱李否合肥龔端毅公鼎孳爲文酒之會延知名士三十餘人君以墮馬後至燭見跋矣必俟君至乃舉爵宛平孫侍郎承澤謝客著書特與君爲忘年友長洲汪編修琬爲文高自矜調獨傾心下君沛縣閻舉人爾梅論詩斷斷惟與君相洽君方欲羅當代之文甄綜爲一集曰文緯人咸冀君之錄其文也故縞紵之投恒倍又持論和婉多可少怪善言作者之心思故人皆樂就君論說永年申檢討涵盼常語人曰聞朱十論詩文使人心惛未若李十九之可親也於時曹侍郎申吉出撫貴州引君爲助既聞三藩同撤君曰



亂將作矣遂力辭歸爲母壽旣抵家雲貴告變歲戊午

天子思得博學文儒備顧問著作之選君被薦入京師已未

三月朔召試體仁閣下賜大官饌高坐而譔申以詔

言謂文武科進士殿試未有此典也君譔畢纒纒千言賦詩

皆極瑰麗閣臣以八十卷進呈顧君不與焉君旣不得意

有鳳陽守延君君與偕守重君自畫諾外悉以委君君留久

之歸築秋錦山房于漾葭灣其南曰觀樞東曰剩觴北曰息

游艸堂坐臥其中弟子著錄者日衆君精心計其築艸堂也

樽櫨柱枅斲斲之屬一經鳩度立匠入巧者于前分授之各

斤旣施不爽尺寸至于相原田治耕稼藝蔬果雖農圃恒歎

以爲不及也其後兩至福州贊巡撫軍事尋以崑山徐尚書

乾學開書局于洞庭山君應其招助修一統志自是歸不復

出子旣罷官與君往還授壺飲酒無異少壯時今年五月君

病瘧旣痊矣復病竟沉寤不起享年六十初娶錢氏兵科給

事中桐鄉諱允鯨之孫生員汝邁之女繼娶陸氏于一人湖

借國子監生孫男三人菊房莖房荅房君所著有秋錦山房

集若干卷嗚呼自君以薦入不登朝簿同時無不惋惜雖然

才也者衆人所嫉當日與君並薦稍以才自振若宜興陳維

崧富平李因篤上元倪粲仁和吳任臣宣城高詠旣登用矣

皆未遷一階以沒以君之才使入仕籍安知不有忌者而君

得優游幕府偃息于田里菽水足以養親大小之山上下之

洵足以樂兄弟詩書足以教子孫耕桑足以課童僕則天之

所以予君者不爲不爲不厚彼一命之榮要不足爲君重也竊意

君雖未仕他時國史傳文苑宜及焉乃因潮偕之請書其平



生大槩以為狀俾後之君子有所考

國子監生錢君行狀

國子生錢君既卒其子炆衰經稽顙請予作狀予與君居同里君之舅譚給事瑄陸閣學棻子中表兄弟也炆又從予游講經學習聞君門世及君行已本末義無可辭狀曰君諱樞初字又鶴世居海鹽半邏村本姓何氏始祖某于洪武中坐事戍黔屬其次子某于錢翁遂更錢氏五世祖薇中嘉靖壬辰進士官禮科給事中以星變陳言請斥方士忤旨免歸講甘泉湛氏之學卒贈太常卿高祖與映嘉靖甲子順天舉人曾祖周內閣辦事中書祖嘉徵以諸生入貢留京師值莊烈愍皇帝初踐位是時魏忠賢方怙勢人莫敢言嘉徵首上疏劾忠賢滔天十罪直聲動一時久之除知松溪縣事還卒于

僧舍考泮崇禎丙子舉人妣譚氏山東布政司參政贈太僕寺卿昌言之孫官生貞和之子君生十齡而孤居巽如成人克盡禮服除兵起城遭屠乃奉母村居而君之祖留松溪唐藩建國擢監察御史時七閩未入版圖謀報有司奉臺檄捕家口繫君獄中祖還始得釋旋補學官弟子授弟楨以書或勸君入國子監試京闈君乃一至都念母譚孺人不已即引歸鹽豉菽水盡潔白之養有餘周其族鄰買田以供舅家墓祭俄弟楨歿以所愛子燔為後及弟婦遺腹生男君殫心撫育之居母巽尤盡孝葺治先世丙舍手植松楸嘗稻麥果窳必薦新于祠屋至于私錢出入無錙釐妄費審緩急後先以分薄厚不嗇不濫人咸服君治家之有法而予嘗遇君子舅氏所劇譚古今事君世受尚書能辨析今文古文中文之別



而兼通周官禮經國理才之方吾鄉自明宣德四年析嘉興縣地立秀水嘉善二縣其時祇依戶籍為憑不以疆界分畫故三縣之田互散民相安者二百餘年迨萬曆十三年嘉善之民忽以糧額不均起訟於是三縣爭訐紛綸不已蓋至今猶然江浙賦風重吳俗相傳明太祖惡張士誠拒守故重斂其民畝稅有輸官七斗餘者君為論辨其非是謂禍始于賈似道經界推排之役當日原有官田民田官田輪租民田輸稅其後知府事趙瀛取而均攤之嘉興官田不及二千頃而民田五千八百餘頃故其賦最輕嘉善民田止三千一百餘頃而官田二千七百餘頃故其賦于三縣中差重輕重由官民田數不均非因嵌田之故著論萬言推行事始更端詰難其言旨悉與予合予益信君學術之有本也君娶陸氏繼娶

吳氏子男六人女一人孫男七人女十人嗚呼今之治舉子業者局守宋儒之訓注百翻兔園之冊足以取科第而有餘問以鄉曲之利弊茫然如坐雲霧其與斯世何裨焉君能繼其家學彊直自遂又以餘力考稽財賦鹽筴之源挈然有會于心發為論辨無異建始文學御史之議惜乎不用于時終老牖下人亦罕有知者此予因炳之請傷君之亡不可以不述也謹狀

亡妻馮孺人行述

孺人姓馮氏諱福貞字海媛世居嘉興練浦之陽考諱鎮鼎歸安縣儒學教諭妣胡孺人生母沈氏教諭君為學官弟子有名交漸廣乃徙居府治之北再徙碧漪坊去先太傅文恪公第近止百步教諭君年過四十無子生孺人特珍愛之五



齡延塾師陳翁授毛詩孝經有費姥者往來教諭君家見孺人聰慧爲先妣唐孺人述之唐孺人屬姥爲妣是夕教諭君夢文恪公衣袞造其門遂以孺人許彞尊爲配寒家自文恪公以宰輔歸里墓田外無半畝之產祖考忱予公知楚雄府事還僅敝衣一麓而已至本生考安度先生家計愈窘歲饑恒乏食行媒旣通力不能納幣彞尊年十七爲贅壻于馮氏之宅遭亂兩家各去其居唐孺人病終丙舍安度先生攜兩弟播遷塘橋之北生祖妣蔡孺人又歿先生益窮苦彞尊旣昏孺人贊予往侍養教諭君以田二十畝持券付孺人孺人語予曰割父之田以奉翁非力養矣辭不受挈其女至塘橋鬻所有金條脫治饔膳爲兩弟補紉衣履隘不能容遂賃梅里道南茅亭之居迎先生至里繼又移居接連之橋予授徒

不給遂南渡嶺越一載歸則孺人徙西河村舍是冬復還梅里所居屋人傳多鬼物目爲凶宅孺人不少懼每晦夜滿屋梁皆白光牆下鷄鳴喙有聲女巫來言發之當得金孺人謝曰吾夫家累世顯官可以不貧今貧若此天也非所得而得之天其殃之矣蓋居是宅十一年未嘗萌一念及室中之藏焉教諭君卒于歸安官舍孺人聞訃攜子昆田及老嫗二人見星而奔是時新塍以西盜賊充斥舟子咸股栗孺人拊心號哭至哀羣盜舟泊岸相顧不忍肆劫子年二十即以詩古文辭見知于江左之耆儒遺老時方結文社興詛誓樹同異予槩謝不與而四方知名士往來于禾者輒造梅里孺人治酒肴必豐雖夜分區畫立辦賓客過者談讌極歡或淹留旬日方去花鈿無多盡付質庫晝夜紡績以贖客至復質如是



以爲常交謫之言初不聞于相內也歲癸卯子客永嘉其冬安度先生病革家無斗儲孺人邀子姊妹同視湯藥子歸未旬日而安度先生棄世孺人哀毀治喪事靡不中禮既而子游大同轉客太原入于京師復留濟南孺人力持門戶歲時臘臘修祀事惟謹延經師于家誨昆田必具酒肉操作愈勤夜率二女治機絞不輟坐昆田于紡車之旁執卷于燈背令就火光課畫所讀書必成誦乃已給紙筆使臨摹法帖凡昆田交游至或有燕朋雜于坐孺人必嚴誡勿與交越五年子歸里爲昆田婚買宅于鄰宅西有竹曰竹垞謀葬安度先生唐孺人于長水之東將井椁矣葬師僉言不利主婦謂改歲乃可孺人語子曰姑之柩留丙舍二十餘年翁亦六年矣此而不葬葬何時乎禍五當之勿悔也乃克葬彝尊以序當

後晦在公孺人事公無以異于事安度先生也歲在乙卯公歿于項氏寡姊之室孺人往治喪成禮宗鄰稱其賢孺人既嫁二女教其孫及外孫一如教子法己未予以薦

名試體仁閣下授翰林院檢討纂修明史辛酉充日講官知起居注是年主江南鄉試雲南平

覃恩封孺人馳贈唐孺人壬戌挈孺人入都癸亥子入直南書房賜居黃瓦門之東甲子元日彝尊方侍宴

天子念講官家人居室特賜肴果二席孺人九拜受之洵異數也是月子被劾謫官三月移寓宣武門外孺人尋病病愈以秋八月浮舟潞河還語子曰

君恩重夫子且留毋悻悻去自是子留京師既補官孺人聞之乃復由江淮北上抵泊頭運河冰合孺人中寒而病扶



入車既至病漸痊壬申正月子復罷官三月解維張灣津路  
滌紆以五月次東昌則分水廂已閉舟車酷暑孺人病又作  
比旋里爲長孫完娶時生母沈先已病歿家人祕不言孺人  
訶知之大慟病復發餽粥不進其後時止時作猶強起櫛沐  
理家務迨冬十一月馮村族人以教諭君墓木且伐來告孺  
人心悸意謂未然既而果遭伐孺人悲憤病愈劇蓋自是臥  
不能起醫藥不能療及臨歿時語不及家事惟執昆田手曰  
汝幼時汝父遠客我教汝讀書冀汝上進今汝七試而名不  
成我又不能待命也夫語訖昆田方哀號而孺人逝矣孺人  
生于明崇禎四年九月廿一日未時卒于康熙三十三年二  
月十四日卯時享年六十有四子一人昆田禮部注籍監生  
娶沈氏女二人一嫁吳江周能察一嫁桐鄉儒學生負錢琰

又從弟彛性沒二女無所歸孺人撫爲己女一攜至京師嫁  
國子監生秀水徐雍一嫁吳江貢生吳南齡孫二人桂孫稻  
孫孺人歸予將五十年少日遭亂恒與予夜避叢篁密篠中  
流離顛躋凡徙宅者十一始克寧居爲兩叔一子四女一孫  
昏嫁治兩翁及母胡器備諸辛苦又津塗往來莫或遑處蓋  
終身憂患未嘗一日自安平居慈愛肯周人之急所至鄰里  
戚懿無不歡洽雖漁娃竈妾食必推與之以是孺人之歿聞  
者無不歎息嗚呼悲夫謹撫其遺行以告立言之君子

誄

故都察院右副都御史總督浙閩軍務朱公誄

嗚呼邾婁之後望沛及吳其在于齊東郡是居枝分葉布本  
一根株公之哲弟謹言無隱撫浙制畿中法而殞紀于太常



易名惟允公也繼起早歌鹿鳴牽絲作宰視草為郎黃圖樹  
屏儷于薇堂

天子是葵殊渥超拜紅籀碧幢填撫嶺外入奏嘉謨出承大  
賚公既莅止綱舉目治薄賦惠商吏畏民懷人不敢者公乃  
有為盜先殺人後收貨賄舊染污俗積不能改公捕獲之悉  
沉諸海江則有沱船則有戈商行千里劃槩而歌頌公之德  
久而不磨既遷于閩治與粵僅閩兵易譁教之以整閩俗易  
蹕鎮之以靜公于仕己喜愠不形扁舟歸第對客一枰宣勞  
河曲疾疾乃嬰公疎禮法曾無水旱厨傳雖盈濁醪糲飯不  
知公者謂公為嫚公率寮屬見必分曹肺腑之語辭不在多  
不知公者謂公為驕公今逝矣還器歷下我瞻大東老成徂  
謝舍彼華堂銜悲長夜公之清忠當代共知吾思他日國史

紀之無徵不信視此誄辭

哀辭

沈武功哀辭

歲在己酉冬子將往濟南友人沈武功送予落帆亭畔越二  
年歸里武功偕予登胥山賦聯句詩未幾別去予留江都武  
功寄予書將葬其父處士君世涵具狀來請銘銘未就鄉人  
自南來則武功以正月癸丑死矣武功幼遭亂失學九齡始  
自讀書日記誦方言長工于詩性恬澹不樂仕進居父器盡  
禮事母至孝卒時年三十沈氏自南京大理寺卿玄華以廉  
慎聞其子文琦博洽負時譽人謂必相繼取科名卒不遇再  
傳至處士君省試將見錄矣復擯而武功亦困窮死嗚呼生  
才實難願武功以上世多文采疑天于沈氏獨厚然皆終其



身不得志以死至死且天此人事之最悲者爰爲辭以哀之  
武功諱傳弓秀水人辭曰處賤以爲榮遇不詭也豐實而藏  
華行勿毀也孰是人斯壽止此也妻亡矣遺其穉女親老矣  
鞠及童孫菽水伊何況甘旨也嗟行之人悲未已也矧在同  
游識君久也嗚呼欲銘其父而先哭其子也

祭文

弔李陵文 并序

朱子登乎采掠之巔覽大漠之野見有雪山峙乎西北若出  
若沒若廬若旅回睇從者忽失其處從者曰是所謂天山也  
李陵之臺在焉朱子曰噫嘻有是哉竊嘗論陵本文士願以  
家世爲將欲立功殊域方其名見武臺恥隸貳師軍請得步  
卒五千自當一隊其才誠有過人者及兵盡矢窮以身降敵

短衣椎結對蘇武泣下沾襟抑何陋也其身辱名墮亦足爲  
負才喜功者之戒然陵方降敵隴西士大夫咸以爲媿而司  
馬遷猶力爭以爲國士雖大節如武終不以衛律遇之交好  
尤篤則其情有可矜者也河梁之詩爲五言所自始使得一  
鳴鏡歌郊祀之盛庶幾史克正考父之美復見于漢乃委之  
漠北幸而武奉使倡和之詩得復流傳于世迨武既歸其悲  
惋無聊之思必有甚于平昔者登臺而望豈乏感時懷友之  
作惜乎不傳者蓋已多矣自古愛才之主宜莫如漢武然其  
所好特司馬相如靡曼之詞枚皐東方朔俳諧之體以遷之  
文陵與武之詩獨未聞有稱焉至柏梁既成賦詩高會當極  
一世之選乃所與賡歌颺言則衛青輩一二麤豪武人及大  
官上林丞刀筆俗吏八九而已此何爲者邪賈生之才文帝



不善用之為世所惜若武帝之于陵用違其才殆又甚焉嗚呼才士之不遇于世自古然矣爰命從者酌之以酒而為文弔之其辭曰

入雲中而四望子路百折以登危眄絕漠之驚塵子悼失身于騫期嗟平城之構患子三十萬其莫支曾不念祖父之數奇子不大賢于武臺以五千當萬騎子固宜心一而不離何女子載于行間子將在軍而莫知儒生不可使即戎子妒人不可與謀無援師以委敵子何百口之足讎死既媿成安子生復慚乎浞野憾因杼之妄言子遂投杆于謀者前奚侯使上坐子後丁靈之嘲我殺身既難能子寧歸國之不可斧冰以為糒子續帶以繩瞻畢昂于南街兮望天漢之東傾朝忽忽其就暮子夜迢迢而獨興雖永絕于君親子尚見思于友

朋刀環既違願子何故鄉之足慕驅索駝于犛牛子獵霜禽與秋兔登荒臺之奠絕子送故人于長路舞短服于樽前子聽悲歌其如訴身雖陷沙漠子盟未忘乎曹柯歎形迹之長乖子豈忠信之可託居殊域而心故都兮夫孰明子之無他彼河梁之高倡子麗五字而為詩感杜甫之遺言兮謂二子其吾師斯人不可作子大雅其衰才士自古而失職子奚吾生之足悲

告江神文

年月日具官某謹以剛鬣柔毛香帛之儀致祭于大江之神曰某欽承

上命主試江南自誓此心澄同江水惟神昭察濟以安瀾如其寸衷有味狗人賄託廢棄真才神靈有知允當罰殛復



命渡江甘葬魚腹以爲後鑒謹告

貢院誓神文

年月日具官某等敢告于天地神祇先師孔子之前曰某備官禁近

皇上拔於衆中俾典試事

主恩深重惟有同事一心攬真才以佐盛治

命下之日師友親懿一概屏絕今入棘闈用白于神如或心存曖昧遏抑真才徇一人之情面受一言之賄託通一字之關節神奪其算鬼褫其魄五刑備其體三木囊其頭刀斧分其尸烏鳶攫其肉矢言之出百神共聞謹告

祭孫侍郎文

公之歷仕記則有史公之生平歲則有銘我姑略焉詳公安

情往歲丁未我未公覲公獲我詩賓座賞擊庚戌八月謁公之堂我祛公攬借步于廊款語未已旋羅酒漿自是過從月必三四公召我趨我歸公至嗟世論文不樂草茅雖在丘園以位自高誰肯忘年撫謙用勞公以先覺自稱同學題扁見貽竹垞之楮我歸二載公顏未改仰屋著書一本程朱河淮之議水田之利舍彼薦紳芻蕘是詢公學不泛攷古能鑒示賓琰玉僉目爲劍尊曰不然作釋圭一篇公書報我謂云可傳歲且更始祠考亭夫子執紼視壺廢徹而舖公言子去歲必來助我考之器見星而奔公命哲嗣馳賻國門書言卧疴未克躬唁期子重來慮不爾見我時臨發對書載眺朔南攸隔歲月其惱既達于京公果逝矣不覩公容覩公孫子回憶公言聲悲益吞僅一人知己而又不存觴酒在筵挺燭在几



我涕有盡我哀何底

祭納蘭侍衛文

嗚呼淫歲癸丑我客潞河君年最少登進士科伐木求友心  
期切磋投我素書懿好寔多改歲月正積雪初霽紉履布衣  
訪君子第君情歡劇款以酒劑命我題扇炙硯而睇是時多  
暇暇輟填詞我按樂章綴以歌詩翦綃補衲他人則嗤君爲  
絕倒百過誦之迨我通籍簪筆 朶殿君侍羽林鮫函雉扇  
或從豫遊或陪曲宴雖則同 朝無幾相見我官旣謫我性  
轉迂老雪添鬢新霜在鬚君見而愕謂我太臞執手相勗易  
憂以愉言不在多感心傾耳自我交君今逾一紀領契披衿  
敷文析理若苔在岑若蘭在沚君於儒術繇學博文詠書  
法靡有不工康里巒巒字朶魯翀暨薩都刺未知孰雄君之

勇略侍

帝左右騎則箭雲射必穿柳出師絕漠不憚虎口

乃卷

帝心倚毗良厚當其奮武不知善文及爲文辭不知

能軍允矣君子才實逸羣隨陸絳灌異於前聞和氣婉容承  
顏以孝友于昆弟古昔是傲謙謙者守溫溫者貌逆之勿志  
順之無傲花間草堂涿水之亭有文有史有圖有經炎炎者  
進或鍵而扁縫掖之來君眼則青浮醪于觚盛倉以筆夜合  
惺忪花散籤帙聯吟比調曾未旬日詩朋尚在忽焉輟瑟  
尊月朔謂君尚生問疾而止入巷心忤復者在屋升自東榮  
魂招不來躑躅屏營寢門旣哭容車將騁大泉一枚蠟燭一  
挺侑以荒辭泣下如縷靈子有知痛無不省嗚呼尚饗

祭劉太夫人文

嗚呼太君其德斯柔色斯愉也孝以爲婦而順以承夫也以



嚴則母慈則姑也卑尊長幼咸克有孚也樂善之勤靡終初也相少保公之起家縣令而躋尚書也太君子時挽鹿車也千里之行奉板輿也在汾之陽在浚之都也錦軍之城白門之辟往必俱也總師于邊贊中樞也耆德既隆壺範益據也九伐司馬五教司徒也三典司寇進三孤也禴翟之榮錦韜象軸貴于閭也公沙六龍皆民譽也其三同懷二入翰苑女封夫人則鳳雛也孫曾則百誥誥揖揖螽斯如也爰自侍郎公之填撫究青徐也河山十二極海隅也沉冤之獄減其辜也敵劫之民緩其逋也災傷之地蠲其租也賑者累萬必及其孥也是乃奉太君之教以成公之訏謨也蓋太君之仁匪特下及家人子姓而已凡賓客之至問所須也及饌遺所無也貸者無不輸也惠心淑問難悉數也嗚呼太君貴矣富矣

昌矣大矣壽矣康矣榮矣哀矣稽之于古殆莫之與符也某等從侍郎公游歷下獲拜太君子堂而忽聞長逝誠不禁涕泗之霑裾也牲之輸也酒之醺也盤有果而俎有脍也踞陳于筵几之前念德容之如昨而不可親矣爲文告哀冀靈之式鑒而享此肴蔬也

### 祭黃母周孺人文

嗚呼孺人嫁不必鄉里寓公是歸產不必多男有子而才當其相夫子而仕也六館四門教胄子也監丞之賢孺人爲之耦也及其殞所天而孀也慈聞之訓兼義方也徵君之賢孺人成其名也嗟世營營聲利是求維孺人之德安貧勿憂餐以菽水不事鼎飪服以縞綈不事玉錦古聖微言載在六經有圖有史百氏縱橫香廚祕閣易散難并監丞耽讀廣爲探



纂徵君益之凡八萬卷朝哦夜誦孺人佐之機紋之聲徹于  
書帷歲著雍敦牂閏月修病我辭白門言歸柴辟徵君邂逅  
周在浚之宅時鶴書初下有司敦迫人為君喜君感其額匪  
榮名是逃念母氏兮劬勞商秋乃發達于燕郊陳情之語僅  
徹東曹哀訃忽至杖桐而號見星斯奔過市則哭觀者道旁  
屏營躑躅矧在彝尊猶子情親帷堂未拜漬酒遙陳臨風涕  
泗媿告哀之不文嗚呼尚饗

曝書亭集卷第八十

曝書亭集

附錄

葉兒樂府

秀水 朱彝尊 錫鬯

折桂令

正宮

鬧紅塵袞袞公侯白璧黃金肥馬輕裘蟻陣蜂衙鼠肝蟲臂  
蝸角蠅頭神仙侶淮王雞狗衣冠隊楚國獼猴歸去來休選  
个溪亭作伴沙鷗

又

故鄉人千里書投漁弟樵兄盼我回舟老僕長鬚侍兒赤脚  
穉子蓬頭趁新雨過時插柳揀綠陰深處騎牛歸去來休二  
頃秫田一簣糟丘

又



掛輕帆潞水春流夾路煙花直下揚州第二泉邊第三船裏  
第四橋頭喚十五女青蛾對酒點兩三條紅蠟藏鈎歸去來  
休老子尊前最愛歌喉

又

近南湖結个書樓橋影前溪塔火中流梅蕊衝寒荷香銷夏  
楓葉鳴秋松樹底一壺村酒柳陰中幾隻漁舟歸去來休典  
我春衣日日郊游

又

問先生老矣何求一片西山幾載勾留獻賦長楊挂冠神武  
捐珮瀛洲也曾簪筆點螭坳右手也曾移家住釐禁東頭歸  
去來休閒把  
君恩說與朋游

天淨沙

一行白鴈清秋數聲漁笛蕩洲幾點昏鴉斷柳夕陽時候曝  
衣人在高樓

水仙子

雙調

昏鐘百八戍樓敲旅夢三千鄉路饒平頭六十今年老算不  
如歸去好得逍遙且自逍遙閒摘朶山花簪帽緊隨身村沽  
滿瓢醉拖條竹杖過橋

又

半湖山上采樵夫百步橋邊垂釣徒三家村裏耕田父這生  
涯都不苦要歸與只便歸與錦屏風蒼厓紅樹白雪灘金齏  
玉鱸綠楊灣赤米青菰

又

爲毛大可輓姬人曼殊豐臺花匠女也



玉堂傳說小名兒檀板能歌絕妙詞銀鈎會寫相思字記人  
扶拜客時勝豐臺一捻花枝留客住豪端染紙想夫憐箏柱  
調絲今日箇長恨題詩

沉醉東風

香茅屋青楓樹底小蓬門紅板橋西雖無蔗芋田也有桑麻  
地野薔薇結箇籬籬更添種山茶綠萼梅這便是先生錦里

又 題周編修漁隱圖

檣頭船茶壚酒盞藕苗衣筍笠筠竿撈鰕柳樹陰放鴨蘆花  
岸畫圖中儘自消閒縱使

君恩未許還終不學鋪眉苦眼

清江引

西風古寺攀楊柳落日低銜岫山行萬里程水次雙江口鴈

兒不來魚定有

普天樂

中呂

小樓前疎林外艾基丹井顧況書臺灣灣綠水深點點青山  
矮鈞侶詩朋看都在把封泥酒壘齊開雞頭竹胎穀芽餅餠  
油菜花臺

又

到清秋開家宴生魚切玉野雀披緜村村籩蟹肥日日湖菱  
賤對竹千竿書千卷悶來時刻箇花船白蓮寺前青陽橋外  
金粟山邊

朝天子

送分虎南還

驢車慢些小住長亭者疎林不隔遠山遮幾點新黃葉雲脚  
天斜鴈書橫寫趁歸人南去也離別漫嗟只可惜中秋月



又  
魚標稻苗爭似南湖好月寒沙柳夜蕭蕭帆影卸三姑廟暗  
水橫橋矮屋香茅看黃花都放了絲絛布袍再不想長安道  
又送融谷宰來賓

箏絃酒船且緩坐紅亭勸仙鳧飛度鷓鴣天種柳濱江縣木  
榭花邊柑子堂前算輕郵道六千涼煙暮蟬話十里河橋遠  
又

花時荔支日日堆江市石牙山翠兩絲絲榕葉交廳事萬里  
相思六六魚兒盼雙雙新燕子清詩小詞帶幾箇平安字

同作

錢唐洪昇昉思

鷓鴣鷓鴣啼徧枕柳樹鬱金香散雨如酥村社敲銅鼓退  
食公餘岸幘升車向青山閒弔古男巫女巫酹酒拜劉因

戶

前題

秀水徐善敬可

梧邊柳邊飛不到衡陽雁牂牁江上伏波船遙把才人餞  
柱葉青圓蕉實黃鮮荔支林紅萬點葛仙鮑仙天付與丹  
砂縣

前題

錢唐龔翔麟蘅圃

雷江瘴鄉到日官梅放訟庭無事晝簾張沉水煙初颺醒  
酒茴香消食檳榔緩平湖菱芡想琴堂笛牀咏不了蠻花  
樣

落梅風

查山探梅

十里青苔路三更翠羽啼泛輕船太湖邊棹等南枝北枝花  
放齊也未必明朝風起



又

細細香苞綻冷泠淺水流趁快雪乍晴時候把短簫橫笛催  
上樓對七十二峯行酒

金字經 憶辰娘作

蝴蝶難分隊鴛鴦擬作雙行近秋花六扇牕剛迴身避乳  
新霜降紅葉溼鞦韆

又

碧浪湖邊樹白蘋江上舟風雨蕭蕭不耐秋愁歸帆郭外抽  
從別後無計再勾留

山坡羊 雙林菴

涼雲池面殘陽臺殿綠槐不吐青蟲線聞河淺寺門偏蹇驢  
斜背風中絳可惜馬蹄歸路遠船橋那邊蓮紅一翦

又 飲池上

昏鴉初定涼蟬都靜絲絲魚尾殘霞剩渚煙冷露華凝香  
笑卷青荷柄我醉欲眠君又醒箏簾內聲燈花外影

醉太平

野狐涎笑口蜜蜂尾甜頭人生何苦鬪機謀得抽身便抽散  
文章敵不過時髦手鈍舌根念不出摩登兜窮骨相封不到  
富民侯老先生去休

一半兒 西溪商調

滿林殘雪碧山坳人日春風金剪刀孤棹野塘紅板橋玉梅  
梢一半兒開遲一半兒早

又 靈隱

冷泉亭子面山崖蕭九娘家沽酒牌壚畔碧桃花亂開到重



來一半兒依然一半兒改

又淨慈

冷雲山寺畫屏秋  
斷塔雷封殘照留  
孤汊酒村風幔收  
載歸舟一半兒蓮蓬  
一半兒藕

又西湖

三潭新月浸魚天  
十里長堤飛柳絲  
尋到水仙王廟邊  
裏湖船一半兒剛來  
一半兒轉

又浙江

鯉魚風起鳳山根  
白鷺潮來鷺子門  
黃雀雨晴魚浦村  
亂帆分一半兒天斜  
一半兒穩

又釣臺

渚蘋山木古祠秋  
漁子眾師犧小舟  
爭道客星天上留  
契相

投一半兒君臣一半兒友

又長山瀧

鷓鴣灘冷渚風清  
謝豹花繁春雨晴  
烏柏樹翻秋葉鳴  
挽船行一半兒山腰  
一半兒嶺

又九峰

一峰低映一峰高  
十里沙連十里橋  
曾記小船迎晚潮  
冷蕭蕭一半兒蘆花  
一半兒草

又虎丘

生公臺上鬪茶巾  
短簿祠前羅酒樽  
真娘墓傍凝舞塵  
款游人一半兒櫻桃  
一半兒筍

又錫山

錫山泉近筍輿稀  
竹火鑪輕松葉肥  
蘭草岸回花舫齊  
恣攜



歸一半兒香醪一半兒水

又金山

城頭殘角戍樓開天際征鴻丁字排攜手試登山上臺暮潮  
來一半兒江聲一半兒海

又淮浦

行來沙際柳陰疎望裏村邊酒幔孤聽得渡頭人語無遠糝  
糊一半兒吳音一半兒楚

小桃紅

題王元章墨梅

斜飛蝴蝶撲枝圓不怕游絲罥疎影依然水清淺嫩寒天墨  
痕澹處珊瑚軟似曾相見稽山風霰一樹小牕前

又

送德尹還里

揚州樺子小於龕粉額朱紅檻一路垂楊繫船纜水拖藍初

鴻幾點秋容澹梅花酒酣蘆花風糝夢穩到江南

又前題

謝家兄弟舊田廬好續春池句兒女團圓紙牕戶儘歡娛閒  
尋掉海塘邊去村醪遠沽曾船橫渡山似小葫蘆

叨叨令

一年一夢空愁思六張五角難成事千呼萬喚無由至姑負  
了燒春酒美文君市悶殺人也麼哥笑殺人也麼哥相見了  
只勝常兩個消魂字

又

烏巾斂了煩遮護縞衣借了親分付画船樣了愁行路有一  
日踏花鹿女花間步行不得也麼哥留不住也麼哥算後會  
他生未卜今生誤



黃鶯兒

碧玉小人家兩眉彎雙鬢丫春風愛立疎簾下佳期最佳陽  
差不差心知消息今年嫁翦秋紗紗翥合畫画取並頭花

皇清勅授徵仕郎 日講官 起居注翰林院檢討竹垞朱

公墓誌銘

經筵講官文淵閣大學士兼吏部尚書加三級澤州陳廷敬  
撰

康熙初北平孫公北海老而家居以經學詔後進子亦往游  
焉孫公盛稱秀水朱君錫鬯之賢一時東南文學士游京  
師者共推謂為老師宿學子心嚮往焉而莫之能識也後舉  
博學鴻詞授官翰林已而長直

內廷予朝夕與君相聚甚驩也甫及一年以謫去子亦以他  
事引嫌求罷仍留書局兩人者時復得以閒居相過從為文  
字之娛游觀之樂數年至今過槐市虎坊之間未嘗不黯然  
以悲也君既南歸後又數年予扈從河上至吳門得見君子



南園至武林又見君子湖上文采風流不殊曩昔而予則頽  
然且老矣又三年君歿君外孫周子象益以君狀來借查子  
悔餘謁銘于予云非夫子孰可志其墓者予弗敢辭雖然予  
既不能爲信今傳後之文亦姑識其平生出處交游之節槩  
凡吾意之所不能盡者世之君子庶幾有得吾兩入之心于語  
言文字之外則君有銘而予亦可以無憾矣君諱彝尊錫鬯  
其字号竹垞先世居吳中自吳江遷秀水高祖諱儒以醫顯  
官至奉政大夫太醫院院使以子貴贈光祿大夫柱國少保  
武英殿大學士曾祖諱國祚以醫院籍由順天府學中萬曆  
壬午鄉試癸未進士第一人除翰林院修撰歷官吏部右侍  
郎引疾歸光宗初起南京禮部尚書入東閣加太子太保進  
文淵閣尋以戶部尚書兼武英殿大學士加少傅歸卒贈太

傳謚文恪文恪公六子長諱大競仕至雲南楚雄府知府子  
五人長茂暉以廕授中書科中書舍人好學問樂取友爲復  
社宗盟輯禹貢補注君嗣父也本生父諱茂曙楚雄公第二  
子也天啓初補秀水學生甲申後棄去卒私謚安度先生撰  
兩京求舊錄有春草堂遺稿安度先生子三人君其長也舍  
人無子以序立君爲後君少而聰慧絕人生數歲嘗見諸神  
物異怪狀不類人世及他人視之輒無所見書過眼覆誦不  
遺一字塾師舉王瓜使屬對君應聲曰后稷師怒答之爲舉  
業文千言立就已能工詩崇禎十三年浙東西大旱饑人相  
食自文恪公以宰輔歸里家無儲粟楚雄公清廉安度先生  
貧至絕食君守書冊自若也旣而曰河北盜賊中朝黨朋亂  
旣成矣何以時文爲不如舍之學古乃肆力于周官禮春秋



左氏傳楚辭文選丹元子步天歌人皆笑以爲狂迂未幾亂果作君年十七贅婚嘉興練浦之陽馮村馮公有客王鹿柴華亭名士也見君大奇之曰此必以詩名世後君名益高四方以幣聘者爭集其門所至皆以師賓之禮遇焉客游南北必橐載十三經二十一史以自隨已而遊京師訪孫公于退谷公過君寓見插架書謂人曰吾見客長安者務攀援馳逐車塵蓬勃間不廢著述者惟秀水朱十一人而已君旣以博學徵試之殿廷相國馮公得其文歎曰奇才

名以檢討充

起居注

日講官在

內直間語予曰公直似益都清如曲沃予謝不敢當以君之

賢至今思其言因以自策勵其亦不得不謂之知言也歟君雖以被劾鐫一級罷尋復原官歸里後數年

駕巡河上至江浙

賜御書四字曰研經博物禮遇之隆固無替于昔時也君旣

退而著書有日下舊聞四十二卷經義考三百卷明詩綜一

百卷瀛洲道古錄

十卷五代史注

卷禾錄

卷齏

志

卷齏志者通政使曹公寅與君合撰者也曹公爲君

刊曝書亭集八十卷未卒業而君歿君之自立如此回視京

華儕輩奔走塵埃中所辛勤而僅有者猶泰華之于丘垤衰

遲蹇鈍之人俛俛然莫適從也得失之林亦可考而知已君

閒居謂其孫稻孫曰凡學詩文須根本經史方能深入古人

突奧未有空疎淺陋勦襲陳言而可以稱作者記云時過然



後學則勤苦而難成獨學而無友則孤陋而寡聞予舉此以  
為教子弟之法焉君在翰林預修一統志主考江南  
覃恩授徵仕郎馳贈生父家居十有九年康熙四十八年十  
月卒年八十一配馮孺人歸安儒學教諭馮君鎮鼎女前十  
六年卒子一人昆田國子監生賢而有文前卒女二人一適  
吳江周能察一適桐鄉貢生錢琰孫二人桂孫國子監生稻  
孫府學生曾孫男二人振祖賜書孫女二人銘曰  
或史而野或經而葩物亦有然為蓬為麻嗚呼竹垞天邪人  
邪得于天者既碩孔多人其謂何

第 85670 号

平成 3.11.22

聖和學  
園短大  
圖書館

928

18

18



号	...
SS	...
...	...
...	...

趙

卷一



